



安徽通志

ル 5  
1575  
67



1805  
1875  
67

重修安徽通志卷二百

人物志

宦績二十三

滁州

北魏李崇字繼長頓邱人文成元皇后兄誕之子年十四召拜  
主文中散襲爵陳畱公孝文初為荊州刺史甚有稱績除兗州  
刺史充舊多盜崇乃村置一樓樓懸一鼓四面諸村聞鼓皆守  
要路故盜發便擒後累統軍破氏楊靈珍俘齊鄭猷等宣武初  
魯陽蠻柳北喜魯北燕等叛詔以崇為使持節都督征蠻諸軍  
討之斬北燕等封魏昌伯進號鎮南將軍討東荊州蠻樊安生  
擒之西荊蠻悉降尋兼侍中出除揚州刺史都督淮南諸軍斷  
獄精審壽春大水入城屋宇皆沒府州勸崇保北山崇曰淮南

重修安徽通志卷二百

人物志 宦績

滁州



萬里繫於吾身一旦動足百姓瓦解揚州之地恐非國物但憐士庶無辜同死可桴筏隨高人規自脫吾必死此時州人裴絢等欲為亂崇皆擊滅之在州凡十年寇賊侵邊所向摧破號曰臥彪孝明踐阼梁趙祖悅襲據西碛石崇遣李神會軍合攻降之乃於碛石成編舟為橋又於八公山更起一城以備大水累表解州乃以元志代之後北鎮破落汗拔陵叛所在響應崇以本官加使持節開府北討累破賊眾坐累免官爵徵還元法僧叛詔復官爵為徐州大都督節度諸軍事會疾篤改除開府相州刺史侍中將軍儀同如故孝昌元年薨謚武康贈太尉宋史本傳

舊志別載鳳陽府名宦今移並增修

李平字雲定崇之從弟太和初拜通直散騎侍郎歷官河南尹宣武將幸鄴平上表諫不聽詔以本官行相州事勸課農桑修

飾太學簡試通儒以充博士圖孔子七十二弟子於講堂親為作贊京兆王愉反於信都平持節北討生擒愉冀州平以本官領相州大中正封武邑郡公梁將趙祖悅偪壽春李崇崔亮攻之未克詔平赴壽春嚴勒崇亮剋期齊舉遂斬祖悅以功遷右僕射散騎常侍卒贈侍中諡文烈北史李崇傳

宋張盥之字景山滁州人父必南唐保大中進士入宋官史館為人長者每寒食必哭拜後主墓分俸贍李氏子孫盥之進士及第校勘館閣書籍歷知温州擢提點淮南西路刑獄雪蒙城知縣王申冤出之獄徙廣南東路轉運使夷酋刑慘酷盥之請一以漢法從事累擢天章閣待制河北都轉運按察使貝州王則叛為人所誣言其得妖人而縱之逸謫監鄂州稅後以光祿致仕生平喜吏事所至有聲十國春秋張必宋史本傳

徐象賢全椒人祥符進士調山陽主簿歷韶陳二州司理陳有巨盜未獲縣取他盜掠服象賢知其冤持不可守怒象賢曰乞緩期不獲願獨坐尋遇赦真盜詣府自首守服其明仕至太子右贊善大夫

江南通志

張次元字公所滁州人以蔭授太子中舍人提舉淮南遷知信陽軍興學延師學者感勸除江淮提點院治鼓鑄釐剔奸弊卒於官山陽徐仲車曰公不可撓清不可污蓋有志古之剛者

江南通志

張環字唐公全椒人洎之孫也舉進士除祕閣校理同知太常禮院歷開封府推官知洪州營校督役苛急其徒將夜殺之不獲諫於門環召問諭遣明日推治黠者十人不爲易校徒兩浙轉運使加直史館拜淮南轉運使三司下諸道責羨財淮南獨

上金九錢三司使怒移文譙責環以賦數民貧對入修起居注知制誥英宗時進左諫議大夫復出知濠州環遇事敢言觸忤權要屢黜不悔

宋史本傳

張璪字邃明環之弟未冠登第王安石與環善引授集賢校理知諫院直舍人院楊繪劉摯論助役安石使璪爲文詰之辭由是忤安石意坐奏事不實解三職既而復之時議建武學璪言文武之才皆由太學出未聞偏習其一者也朝廷既復河隴欲因勢戡定夔蜀荆廣諸夷璪言先王務治中國今生財未盡有道用財未盡有禮不宜遽及徂征之事元豐初權度支使知制誥判國子監增博士弟子員月書季考歲校以行藝次升略倣周官鄉比之法立齋舍八十二其議皆自璪發之爲翰林學士詳定官制四年拜參知政事哲宗時言者攻之以資政殿學士

出知鄭州進大學士知揚州卒贈右銀青光祿大夫諡簡翼

宋史

本傳

吳蔚全椒人熙甯進士授臨淮簿青苗法行旁邑奉行峻急蔚施行得宜民以不擾歷知廣德彭池三州所至興學校得士心

江南通志

吳革蔚之弟與兄同登進士授楊子主簿遷貴池令有兄弟爭

訟者流涕譬曉俱感泣去知廣德軍值建平歲饑力請賑濟全

活萬計知南雄州發奸摘伏郡內肅然歷湖南運判卒子五人

朋並并茲珏皆登第

江南通志

明何世隆滁州人元季糾義兵捍鄉里太祖初起率眾歸附授

萬戶即命守滁以功累遷右副都元帥州當兵燹後民物凋殘

盡心拊綏眾賴以安

萬姓統譜

楊元杲滁州人家世儒者從太祖渡江為行省左右司員外郎

與陶安等更番掌行機宜文字以郎中擢理軍儲於金華智慮

周密歷應天府尹卒於官子賁博學強記以詞翰知名薦知大

名縣仕至周府紀善

明史本傳

阮宏道滁州人世業儒從太祖渡江以郎中從都督朱文正守

南昌有功帝嘗曰文臣從渡江掌簿書文字勤勞十餘年無如

楊元杲阮宏道李夢庚侯元善樊景昭者宏道後歷福建江西

行省參政卒於官侯元善者全椒人歷官參知政事後無所見

明史楊元杲傳

夏杭滁州人明初安福守禦千戶亂後務存休息平南里寇又

平西寇繕城池新堂廡修學宮及古陂梁政蹟甚多

江西通志新增

方用全椒人洪武初由總旗累官至指揮使隨西平侯沐英入

滇開設陸涼衛卽掌衛印修城池建公署興屯田安民禦寇著有嘉績一統志雲南各官

吳顯滁州人洪武中知平江縣處已正直歲旱禱雨輒應事聞詔增一級免部考湖南通志

魏忠字文卿滁州人介特有守以薦授諸暨州判調洛陽令遷守大同政尚清簡吏民德之月俸僅取足餘悉歸之官萬姓統譜

范麟字孟禎滁州人洪武中以鄉學訓導調慶陽府學訓士尚嚴學者敬事之徵知襄垣縣剛正不阿治績茂著同州端章甫任六合丞以廉吏升知鄱陽有能聲滁州志

武信字大本滁州人洪武甲戌進士歷知介休屯留二縣事所至有聲轉浙江布政司理問永樂初以薦爲福建按察僉事以艱歸起補陝西僉事從征交趾有功以諳其地風土習俗畱授

順化府知府滁州志

黃純全椒人永樂庚子舉人歷輝縣蒲圻教諭宣德初詔選文學士擢兵部給事中疏陳時事皆中窾要命爲江西提學副使士人翕然稱頌江南通志

李本滁州人永樂中知臨湘縣潔己勤政吏民頌之湖南通志

章惠全椒人宣德中以貢知平陽縣廉惠得民每有句攝不遣吏卒止用粉牌以次傳遞題其版曰不飲不食於民有益人隨牌至庶免譴責邑中便之無違令者初工部追永樂間爛弓箭

絃惠奏請寬恤得俞旨因推恩蠲及天下江南通志浙江通志

沈清滁州人以軍功累官都督正統中修建京師九門城樓及

宮殿成封修武伯卒謚襄榮子榮襲十四年從北征死於土木

之難天順初追封侯謚僖愍明史功臣表

劉清字廉夫滁州人正統戊辰進士選庶吉士己巳之變也先犯德勝門百官分地守禦清督衛士防禦甚嚴擢兵科給事中巡視紫荆關又佐都督毛福壽討竹查山叛苗所得廩賜悉頒麾下將士感勵遂大奏捷擢刑部侍郎以忤權貴左遷四川參政卒

江南通志

石澄字士廉滁州人天順丁丑進士授刑科給事中一日進讀章疏英宗喜其辭氣侃直呼為石給事而不名繼因彈劾稱旨書名於屏升鴻臚寺少卿

江南通志

劉必賢字天祐滁州人天順丁丑進士歷知諸暨南城二縣俱有惠政擢御史出守衢州有治聲

江南通志

黃瓌全椒人純之子也天順庚辰進士擢御史振肅風紀坐劾權奸左遷常山丞升知化州轉道德二州所至興學祛弊政化

大行

萬姓統譜

劉愷字伯和滁州人清之子也天順癸未進士知武陟縣有惠政擢御史劾閹人蔣琮罪疏三上謫瀏陽丞歷知薊州薊為畿輔劇地素多權貴侵撓吏治愷一無所徇雪密雲失機者自參將以下死罪百餘人累擢福建參政

江南通志 滁州志

吳璋全椒人成化丙戌進士授戶部主事抽分蕪湖盡卻耗羨歷郎中以清正忤貴臣出知鶴慶府廢淫祠興禮教滇人化服

江南通志

錢山字靜夫滁州人成化丙戌進士授御史出為浙江僉事築海塘以禦水患轉江西僉事行部至豐城會大水民饑不及請即發粟賑貸遷副使致仕

萬姓統譜 江南舊通志

張綱字萬善來安人成化戊戌進士授南戶部主事歷郎中出

知岳州以簡素自持平恕為治調黎平未赴卒子楠正德戊辰

進士仕至貴州參議江南通志

石棣字允升滁州人澄之子也宏治庚戌進士授行人擢御史

出按廣東歷升太僕少卿性儉約每出減軒蓋騶從調順天府

丞以疏劾劉瑾不軌謫茶陵知州時論壯之江南通志 滁州志

常道字文載來安人宏治乙丑進士知昌邑縣持身廉正涖事

嚴明人不敢干以私擢戶部主事奉敕賑濟八府流民全活無

算升萊州知府歷山東左參政平萊蕪巨寇超拜右僉都御史

巡撫山西調兵平青陽巨寇陳卿等致仕歸江南舊通志

孫序字尚禮滁州人以貢授長清訓導勤教諸生其貧而敏者

贍之卒於官諸生日夕臨奠輒歸送至數十里外號泣去滁州志

于鏊字器之滁州人正德戊辰進士授戶部主事解邊鎮餉金

督徐州倉儲皆以廉謹聞選御史巡視長蘆釐政兼理河道所

至剗弊剔蠹風采大著繼巡宣大宗室中貴皆望風悚服遷浙

江按察副使擒大盜湯毛九等進山東按察使調貴州致仕江南志

孫存字性甫滁州人正德甲戌進士授禮部主事嘉靖中知長

沙府修嶽麓書院及敬一亭請置山長藏御書士風蒸蒸日上

定藩田租銀民免苛擾累遷河南左布政精於吏治嘗輯一代

典制與疏例互相發者附於律名曰讀法一統志

周冕字服之滁州舉人知新安縣時洪水為災冕築隄千餘丈

民免漂溺擢南御史遇事敢言中外憚之查勘各衛屯田及紫

沙等處蘆洲清界阨除宿弊以忤權要出守鶴慶不赴乞歸江南通志



彭儒字伯真全椒舉人歷宛州濟南泰安同知居官廉謹尤多

幹略文牒盈前片言立判江南通志

袁仁全椒舉人知德興縣性直忤當道遷德安府教授由饒郡

之德安舟遇盜詢知為德興令相戒曰此慈仁長者勿驚也滁志

志

戚賢字秀夫全椒人嘉靖丙戌進士知歸安縣有蕭總管廟報

賽無虛日會久旱賢禱不驗沈木偶於河居數日舟過其地木

偶躍入舟舟中人皆驚賢笑曰是特未焚耳趨焚之潛遣健隸

伺其旁誠之曰水中人出械以來果獲數人蓋奸民募善泅者

為之也調唐縣擢吏科給事中當大計時言事諸臣忤柄臣意

率假計典錮之賢乃先事言所黜有未當者宜聽言官論救帝

稱善從其請會參議王存章商臣言事忤要人前給事中葉洪

劾汪鉉被謫皆在黜中言官據賢疏申救吏部持不可賢乃劾

鉉竝及張孚敬帝心善其言而不能用太廟災復劾郭勛張纘

而薦聞淵等可任用謫山東布政司都事尋以父老自免歸明史

本傳

胡松字汝茂滁州人嘉靖乙丑進士知東平州設方略捕盜民

賴以安歷山西提學副使上邊務十二事帝嘉其忠懇進秩左

參政松疏上當事者惡其侵官及遷擢愈忌之不畀以兵柄令

於三關聽用欲以陷之寇大入抵太原於是竝論松虛議無補

亟為民家居十餘年始起為陝西參政分守平涼嚴保甲均賦

稅置常平簡伉健三遷江西左布政使以右副都御史巡撫其

地所部多盜奏設南昌南豐萬安三營遣將討捕以次削平進

兵部右侍郎巡撫如故以會討廣東巨寇張暉及援閩破倭功

賜銀幣召理部事歷遷南兵部尚書進吏部尚書卒贈太子少

保諡恭肅

明史本傳

胡榘字汝嘉松之弟也以兄蔭除順天府治中修貢院緝江洋

盜升寶慶知府時蠻酋李文祿屢剿未獲榘以計擒之

江南通志

孫孟字端夫滁州人嘉靖戊戌進士累官杭州知府所至有惠

愛尤以風勵人心為主如建岳武穆揚清祠亦其一端

江南通志

州志

宋璘字玉輝來安人嘉靖中以舉人授嚴州推官鞫獄詳慎嘗

平反淳安連坐重獄者攝建德事卻賦絹例金時監九廟大工

材木徽商某持金為獻拒之其人復倍其金峻拒乃已卒於官

子行可亦由舉人授嚴州推官潔如其父

一統志浙江名宦

邵夢麟字道徵滁州人嘉靖己未進士授大理評事晉寺副歷

河南僉事清屯田數萬頃置兩驛以蘇民困擢浙江參議分守

溫處會倭寇溫擒其酋馬打一似拖等數十人倭用衰止後為

江西提學副使升山東參政卒

江南通志滁州志

竇潤字子雨滁州人嘉靖乙未進士授戶部主事分司徐州秋

毫無取事竣還部卒於京無以斂人服其清

江南通志

孟津字伯通滁州人嘉靖中以舉人知溫縣歷寶慶府同知操

持廉潔弭盜安民稱一時循良最

湖南通志

趙相滁州舉人授寶慶府推官有治聲鯁介廉潔誓一錢弗取

曰吾以其餘遺子孫

滁州志

汪繼志全椒人嘉靖中以貢授東昌判折獄明敏月糧有羨則

輸之公有與之善者欲為之介紹見嚴嵩執不可竟以此謫歸

江南舊通志

滁州志

黃璉字玉輝全椒人登進士為御史抗疏有直聲謫知化州制府所下事或不便民長吏束手璉獨執不可制府從之賊首胡公威擾害地方璉募驍勇伺其常所經地撲滅之其能任事如此

廣東通志 新增

江以東字貞伯全椒人隆慶戊辰進士授戶部主事有尚書以事相屬執不可其人欲中傷之使伺其隙則他行皆潔始驚服歷南考功郎督江西學政引疾歸布袍乘驢道為尉所呵不知為故督學使也

江南通志 滁州志

石應岳號可峰來安人隆慶辛未進士選庶吉士改給事中建白彈劾惟務大體不矯激以為名歷官戶部侍郎

江南通志

彭夢祖字應壽全椒人萬曆庚辰進士授戶部主事累遷浙江台紹副使刊布台郡易俗四宜升參政固海防儲軍實以疾歸

江南通志

周幹字敬源來安人以選貢知壽昌縣剔奸釐弊時屆大造親臨畎澮豁除荒蕪剪豪強禁溺女火耗常例概不之取升青州府判有沐德者追而餽之金強之受擲於崖側而去

浙江通志 江南舊志

通志

金惟精字子一全椒人萬曆閒貢任蠡縣訓導教率諸生敦尚名節貧不克婚者捐俸資之

江南舊志

馮師京字九如來安人萬曆戊午舉人知永康縣以清惠聞於時

江南舊志

王嘉賓字國賢滁州人萬曆癸未進士知定海縣親給駐軍糧餉杜大帥及監軍侵漁之弊調諸暨設方略擒巨盜以艱歸起補海甯築海塘銅鞮數十里以捍水患徵拜御史卒

江南通志

賈巖字魯瞻滁州人萬曆壬辰進士授戶部主事時國本未定疏請册立慷慨數千言尋升考功郎趙南星典計以清正被斥巖抗疏申救謫曹州判官投劾歸卒天啟中贈尚寶丞

孫瓏傳

一統志明史

李鵬南全椒人萬曆時以舉人知尉氏縣釋冤囚有惠政遷雲南府通判後歿已久流寇躡全椒有尉氏人特訪其廬哭拜而去

江南通志

楊于庭字道行全椒人萬曆庚辰進士授濮州守升戶部員外歷兵部車駕職方郎中時石繼芳拒命御史請別遣重臣往于庭以卒伍干紀惟責督臣擒治何煩別遣上嘉納之倭寇之變尤多贊畫及事平而竟中察典歸卒贈尚寶少卿

江南舊志

萬一本全椒人萬曆四十八年以選貢任平陽府通判明敏幹

濟屢署州縣所至皆有能聲後解組去前所蒞地士民皆遮道送之祀名宦

山西通志

于世材字孔良滁州人以貢授建甯府判廉謹自持卻餽卹貧致仕歸百姓攀留泣送

滁州志

吳道昌字居庸全椒人天啟壬戌進士授行人選御史巡按居庸紫荆兩關墨吏皆望風解綬督學順天絕無所徇還為御史以兵燹上疏乞緩徵又有馬價一議鋤奸猾省扳報人沐其惠以積勞卒於官

江南舊志 滁州志

張士俊字子登滁州武舉守備靖州殲草平諸寨寇督餉揚州建言開高郵邵伯越河漕運使之升真定游擊修隍禦邊撫軍士如子弟升永生參將同州藍守素字泗洲以武進士任四川都指揮使自製火器名九龍鎗每用以卻敵流寇攻滁其鄉人

崔維崧者持九龍出戰賊弗之識遂殲焉由是諸郡倣而製之

除州志

魯近孔字泗水全椒選貢任河南靈寶主簿縣多鑛盜積歲難

平近孔擒其魁散其黨悉平之升本府經歷引疾歸

金光辰字居垣全椒人崇禎戊辰進士授行人擢御史發內使

奸狀出按河南條奏三百餘章還朝京師戒嚴分守東直門劾

張鳳翼三不可解一大可憂帝復用內臣監軍疏請罷遣召對

平臺詰責再三辭氣不撓謫浙江按察司照磨召為大理寺正

進太僕丞復召對咨以救荒禦邊安民之策光辰娓娓數百言

帝為聳然擢左僉都御史以救劉宗周鐫級去

張榮全椒人東安典史苦節無妄取在任二年修古北口城七

十丈因母老乞養歸

全椒縣志

常自修來安選貢授沂州丞攝保德令平反冤獄除民買草之

累升永平府通判分守山海關時大瑞高準橫甚自修數與之

抗不少動致仕歸

沂州志

國朝金光昊全椒人光辰從弟也少侍父九陞官棗陽流寇偏城

佐父固守城獲全舉崇禎壬午鄉試入

國朝知長子縣嚴正不妄接人懲胥吏之作姦者不少貸豪猾皆

聞風避勸農巡阡陌間與野老狎語俾得各言疾苦大旱雩祀

膝行數十里為民涕泣請命甫一年卒於官民為修勸農坊以

志遺愛

一統志山西名宦

金拱敬號止菴滁州人父若嵩居鄉有長者名拱敬性至孝母

病割股以療之成前明癸未進士入

國朝順治三年授兵部主事歷郎中充會試同考官所拔熊伯龍

等皆名雋升太僕寺少卿管吏部文選司郎中事究識流品諳悉人物人比之山巨源裴光庭卒於官

江南通志 滁州志

吳國縉字玉林全椒人順治己丑進士授江甯府教授學宮久不葺捐募治之不足自家運田穀佐之江甯令崔某呂某皆以交代羈留呂遂客死國縉為經紀呂喪而資助崔乃得生還又雪冤生梅進湖獄助贖豫章諸難婦非博士沾沾態也卒於官

江南舊志

吳國對字玉隨國縉之弟與弟國龍學生順治戊辰進士第二人及第授編修累遷侍讀督順天學政頒三訓以教士敦孝弟崇實學正心術士風丕變國對才學優贍工詩賦善書言論風采為一時館閣推重

一統志

吳國龍字玉駟國對弟也前明癸未進士授戶部主事順治初

以漕撫蔡士英薦徵用康熙初授兵科給事中轉禮科掌印疏請臨雍定經制省參罰禁祥瑞復起居注量入為出以備凶荒奏議十數萬言有神軍國大計典試山東稱得士乞假歸遂卒

一統志

金光房字天駟全椒人光辰弟順治己亥進士授九江府推官以廉明稱裁缺補知瓊山縣益著清節議均貢香黎人樂附鄰縣有欲以剿黎邀功者力寢其事鎮兵譁單騎出諭之軍情帖然得無變卒於官子作鼎康熙甲辰進士有文名早卒

一統志

朱宏憲字守謙全椒舉人授溧水教諭升知完縣均徭革耗邑多輕生每以投繯服毒構訟不止宏憲概置不究舊習頓革乞休歸父老攀轅垂泣至不能行

江南通志

武蓋字世馮來安人順治中以貢知歸善縣時里甲苦邊寇類

多逃亡孤丁應徭不堪重困盡特寬宥之東平鹽埠為通邑盜患力請禁革勘遷海界萬軍雲集獨能多方安置不致顛連尋以勞瘁卒官民咸感泣

一統志廣東名宦

金鏞字西侯拱敬子以蔭知嘉興縣民苦積逋前令多坐累不能去鏞咨詢疾苦有糧不能辦者自運滌米賠解嘉民感之爭輸恐後積逋一清以忤上官坐累歸

滌州志

陶堯行字敬我滌州人順治中以副貢授永豐丞約己愛民與士子講藝論文娓娓不倦見者不知其為有司官也署興安篆多惠政一時無不以循吏相許乞休歸士民攀轅泣下

滌州志

朱大乾字健偕滌州人宏憲子順治辛丑進士知章邱縣為經理前令所逋而歸之章邱正賦外有漕例於交縣後復運德州一漕二費最不便民大乾請之上憲徑運德倉又有南城米近

千石費倍於漕為請并入漕項民尤稱便又加意學校於舊額外請增文庠二名武庠五名永著為令以盜案左遷士民請留不得相率泣送勒石誌德

滌州志

李成瑛字禹桃來安人以貢歷任泗州青浦華亭訓諭所至士風振起後選上元教諭修學宮清義田恤寒士卒於官諸生相率祭奠送其櫬至江上環泣不能去

滌州志

金獲字楚堂全椒人官黔西知州州人與苗民訟歷任不決獲至立判苗大悅服以珠寶嵌鞍飾馬以進正色卻之調永甯以疾歸獲前後履任必對神自矢不受民間一錢黔西立生祠焉

全椒縣志

吳邦基字德馨全椒人康熙丙子舉人授浮梁知縣歷署饒州府同知明敏練達浮人作琪棠集以美之

全椒縣志

陶虞颺全椒進士康熙二十一年知達州時寇氛初息哀鴻星散虞颺心存寬厚政尚和平薄賦省刑流遣趨附以艱歸士民

懷之四川通志 新增

王廷諍字紫泉全椒人雍正癸卯舉人丁未大挑

廷試有用儉成廉以勤補拙二語

世宗憲皇帝面加

獎諭發滇省試用初知嶧峨縣置藉田興水利減役清糧平刑弭盜決烏蒙匪黨獄多所全宥擢昭通府大關同知招集流亡給貲耕種募鄉勇儲糗糧為巖疆防禦計民咸安堵以疾歸乾隆丙辰起知宛平升泉州知府築考棚修先賢諸祠為學宮置祭器樂器濬八卦溝以禦海漲建石閘以利開墾厥績尤偉擢汀漳龍道晉福建按察使署布政篆以誣罷歸旋奉

特旨起補濟東泰武道調江西鹽巡道以督理隄工得疾乞休加按察

使銜致仕全椒縣志

朱士鈺字式如全椒人雍正癸丑進士知廣西貴縣性慈政和凡有爭訟必諭以公堂不可輕到毋廢時失業虧體辱親民相

感勉獄訟以稀乞養歸士庶攀轅泣送全椒縣志

孫略字圮授全椒人乾隆丙辰進士選庶常出知繁峙縣在任

十年積弊盡除卒於官全椒縣志

吳雱遠字惠疇全椒人以知州補台州府判告歸浙民攀轅寫

圖歌詩載道

世宗憲皇帝賜以悅心集感應篇歸築

賜書樓以志感卒年八十二全椒縣志

郭紹鈞字雲奏全椒人乾隆戊午舉人知甘肅安定縣振興學



校人文蔚起凡決一囚必閉閣自責百姓感格遷善至今思之

全椒縣志

郭之銓字廷可全椒人乾隆己未進士知廣西灌陽縣甄善疾惡發奸摘伏強宗猾吏憚之而延接士大夫談論藹然可親以

艱歸全椒縣志

吳槃字碧波全椒人以教習知寶坻縣

高宗純皇帝諭順天沿河州縣修理隄防槃卽星夜督工不日築成是

秋果大水寶坻獨完固無患

上嘉其勤特擢山西大同府知府全椒縣志

郭嵩字喬望全椒人乾隆丙子舉人知陝西南鄭縣修學宮建

考棚興水利溉田數萬畝金川之役軍書旁午無絲粒累民署

畱壩同知武關臨大河爲建萬年橋以利涉厥功尤偉全椒縣志

郭孫錦字天織全椒人乾隆辛酉舉人知安義縣冰檠自矢明

察慈和士民有酌水茹蔬秋霜夏雨之頌全椒縣志

吳鉞字愛棠全椒人以知州借補無錫縣邑龍塘村民家懸有

神軸男女奔走報賽極盛鉞適以緝盜至與神約二十日不得

盜則當撤屆期不驗竟撤之調吳縣擢邳州知州吳人然香河

干走送者不絕遷奉天同知卒於官全椒縣志

郭元灝字度千全椒人乾隆甲子舉人知湖北孝感縣邑有陂

塘久廢捐俸修治民以郭公隄名之性明察決獄無滯擢沔陽

知州全椒縣志

王篤祐字尊光全椒人乾隆庚辰舉人知山西臨川縣立書院

購經史以造士人文甲於一郡邑民不知紡織妻胡氏製具令

民間老婦入署親教之至今邑蒙其利又出簪珥助買田畝爲

書院膏火故陵之士女婚先設王大尹胡孺人位奠拜而後廟見擢雷州府同知以疾歸起補洮州廳同知署甘州府皆有聲

全椒縣志

吳光奎全椒人官四川成都縣丞官兵征金川光奎轉餉無誤嘗自木果木軍營回猝遇賊曾決戰身受重創敘功升崇甯知

縣全椒縣志

楊作霖字雨亭全椒人乾隆庚寅舉人揀發四川值打箭鑪土司不睦奉總督檄往諭導以大義無不服帖歷署榮經中江等縣補儀隴所至嚴保甲減差役免濫稅讞獄務得其情嘗自言曰民之多辟由長吏貽之戚耳以勞卒於官全椒縣志許如蘭字芳谷全椒人乾隆乙酉舉人知江西新建縣修整圩隄首捐廉二千金為倡又於二十二都捐金五百創築新隄荒

田悉成腴壤民呼為許公隄嘗署浮梁地棍與奸胥表裏為害重加懲治民賴以安全椒縣志

朱昂字廷暉全椒人嘉慶丙辰進士知廣東長樂縣調合浦府署失金獲盜三人昂察其中有一人色慘而貌淑細心詰問果

為盜所誣者遂雪其冤眾稱神明全椒縣志郭在旂字芸樓全椒舉人道光二十二年任湖北常甯知縣建清溪書院捐修薛公橋民情感戴建三所亭以誌遺愛取詩甘棠三章意也全椒縣志

吳璪字璞生全椒拔貢湖北知縣署光化盡心整飭胥役帖然游升沔陽州知州督修隄工不辭勞瘁武岡州民變調赴軍營

卒

贈知府銜廕子縣丞全椒縣志

黃紹香字述人滁州監生江蘇通判署太湖同知每日自晨至暮坐廳事理訟牘不少休清釐積案二百餘起數月後訟庭草長去而見思滁州志

戴宗遠來安進士由庶吉士改刑部主事終刑部侍郎精於例案讞獄平允著有秋審條辨官江蘇河庫道時研究河務著河渠志來安縣志

江錫麒全椒優貢四川溫江知縣聽斷明決累年陳案一訊而服富室某悔婚賄求斷離錫麒即以賄畀其壻趣令成婚調雙流卒官全椒縣志

薛春黎字稚農全椒進士由編修改御史亢直敢言屢疏彈劾權貴咸豐十一年疏請

乘輿不可遠出以固邦本又疏請解散脅從以孤賊勢竝薦循吏七人

同治甲子典試江西卒祀鄉賢所著詩文曰味經得雋齋集全椒縣志

薛暄黍字藝農全椒舉人官英山訓導升安慶府教授胸次高潔訓課勤懇士心歸之懷甯縣志

和州

宋沈立字立之歷陽人舉進士簽書益州判官提舉商胡埽采撫大河事迹古今利病為書曰河防通議治河者悉守為法遷兩浙轉運使蘇湖水縣戒豪民發粟以賑立亟命還之而勸其自稱貸須歲稔官為責償茶禁害民著茶法要覽乞行通商法三司使張方平上其議罷權法如所請召為戶部判官奉使契丹適行冊禮欲令從其國服不則見於門立折之曰往年北使講見儀未嘗令北使易冠服況門見耶契丹愧而止遷西京北

轉運使進石諫議大夫出為江淮發運使居職辦治初立在蜀  
悉以公粟售書積卷數萬神宗問所藏立上其目及所著名山

水記三百卷

宋史本傳

魏砥字邦達歷陽人宣和二年上舍及第建炎時召赴闕改宣  
教郎紹興初歷遷考功郎會星變砥言治平閒彗出東方英宗  
問所以消弭之道韓琦以明賞罰為對今大臣黜陟不公所以  
致異上識其忠擢御史又因臨安火災言宜甄別邪正劾內侍  
李廙刃傷弓匠之罪論宰相朱勝非無所建明劉豫入寇趙鼎  
決策親征砥請扈從劉光世韓世忠張俊三帥不協砥為勸諭  
交歡由是眾戰累捷遷祕書少監在職七月章凡百二十上除  
權吏部侍郎金使入境命充館伴砥以和議之非辭改命吳表  
臣砥因極言屈己就和之不可忤秦檜以艱免後起屢出奉祠

卒

宋史本傳

張祁字晉彥烏江人以兄邵奉使恩補官負氣敢言素與胡寅  
厚善秦檜憾寅并及祁會祁子孝祥與檜子埴同登第考官已  
定埴冠多士高宗親擢孝祥第一檜愈怒風言者誣祁有反謀

繫詔獄將株連邵值檜死得免

宋史張邵張孝祥傳

張孝祥字安國祁之子也紹興二十四年廷試第一授祕書省  
正字首言總攬乾綱以盡更化之美又言故相文致鍛鍊成罪  
者乞令有司改正又言王安石作日錄美則歸己今故相所作  
時政記乞取詳審是正黜邪說以垂無窮從之累遷起居舍人  
出知撫州涖事精確移守平江庭無滯訟以張浚薦召入除直  
學士院兼都督府參贊軍事出知靜江治有聲績復知潭州為  
政簡易濟之以威湖南遂以無事徙荆南湖北路安撫使築守

金隄自是荊州無水患卒年三十八孝宗惜之有用才不盡之

歎宋史本傳

張孝伯孝祥之從兄也隆興元年進士嘉泰三年知鎮江府召除同知樞密院事四年兼參知政事時韓侂胄擅權孝伯勸之以為不弛黨禁後恐不免報復之禍侂胄以為然一時貶斥者得還故職子即之官至直祕閣以書聞天下金人得其翰墨重之如寶宋史宰輔表及韓侂胄傳萬姓統譜

張郊字彥之烏江人知儀徵縣會詔兩淮郡守各上用錢券利害郊力言兩淮凋瘵無土產可貿易所賴錢幣而已若用券商賈且不行帝采其言請城真州身自督役四旬告竣儀徵縣志陸同字彥和歷陽人以父有常蔭知望江縣先是朝廷行營田民未復業者籍之募民耕種為官莊後民既復業猶俾於賦外

並輸名曰附種營田同悉請罷之改知廬江縣中外交薦孝宗喜其能記中原事書名御屏除知房州遷京西轉運判官首罷襄陽薪蒸之禁請祠卒一統志

徐蕙字子禮歷陽人乾道中知江陰軍以郡田汙下溝瀆久淤請盡蠲秋夏之當輸者報可又江陰認辦臨安和買綢絹四千餘疋民甚苦之蕙極言地狹民貧懇切祈免卒如所請命下之日歡聲動阡陌江陰縣志

張孝曾歷陽人淳熙中知郢州奏建廂軍禁軍守禦軍三營兵安其居復廣招募割俸緡為聚室家俾生息蕃衍又嘗築隄百里以障水患一統志湖北名宦

王蓮字少愚和州人慶元間知臨江軍故郡市黃雀鮓歲遺朝貴率三萬計蓮至悉罷之免萬里苞苴之勞政聲上聞召還去

之日凡供張物器悉歸公帑秋毫不隨仕至戶部侍郎江西通志新

增 方備歷陽人嘉定中知旌德縣修學校沒入靈源淨屠田三百

餘畝以虞諸生建豫備倉立平糶法民賴其利一統志 舊志甯國府名宦

新 趙時賞字宗白和州宗室知旌德縣德祐初北軍至境時賞擁

民兵捍戰有功升直寶章閣宋史本傳

張茂之字宗榮含山人宋末為淮南轉運使稱寬厚長者江南通志

元王虎英字雄甫歷陽人大德中為南安路總管專行政教尤

盡心於學校改枋大成殿增飾學舍今規模制度皆其遺跡江西通志新

明王宗顯和州人僑居嚴州胡大海克嚴禮致幕中太祖征婺

州大海以宗顯見太祖曰我鄉里也命至婺覘敵潛得城中虛

實及諸將短長以報既而婺降與宗顯所刺事合改婺為甯越

府以宗顯知府事宗顯故儒者博涉經史開郡學聘葉儀宋濂

為五經師戴良為學正吳沈徐源為訓導自兵興學校久廢至

是始聞絃誦聲未幾卒明史本傳

趙廷蘭和州人洪武初知漢陽縣有幹局創建縣治民不告勞

朝廷嘗遣使徵陳氏散卒他縣多以民丁應廷蘭獨言無有民

以不擾一統志湖北名宦 按明史王宗顯傳作趙庭蘭徐州人

馮榮和州人洪武三年知華亭縣錢鶴皋為亂榮被執不屈邑

民何潤挺身詣盜力言榮良吏宜釋始得免及亂定總兵葛俊

怒從亂者欲盡殺之榮固爭止戮渠魁而貸良民之誑誤得活

者數萬又興學勸農平徭清獄民益感悅南畿志 江南通志

徐伯常和州人嗜學篤行洪武初舉人才由典史歷知縣以廉

幹聞案無畱牘江南通志

黃采字宗素和州人洪武中以監察御史出知兗州府和平寬

厚秩滿民詣闕請畱復任九年山東通志

蔡玉和州人世舊功臣洪武十一年由長沙衛指揮僉事調海

南衛開展城池起砌瓦屋營房建演武亭革去酷政賢明廉謹

存恤軍士惠愛及民廣東通志 新增

吳秉直和州人洪武初舉人才知秦興縣為人純篤蒞事果決

尤敦尚風化民俗歸厚江南通志

張貞字有祥舍山人茂之孫也洪武中膺文學薦授真定知縣

以慈惠得民心秩滿老稚攀畱至不能前遷都督都斷事致仕

永樂初以循吏召用貞因疾固辭特詔褒嘉江南通志

王敦字子學舍山人永樂初由楷書授撫州府推官擢東昌府

通判調重慶所至以廉謹稱閒值疑獄必誠心推讞多所平反

歷官三十年家無餘資江南通志

楊賢和州人永樂閒任高州府推官治獄務存哀矜卽罰當其

辜猶反覆鞫訊恐其誤入賊受囑扳良民民懼餽千金求免賢

笑曰誠賊也萬金不可贖已燭汝冤自當釋汝烏用金為遂還

之急釋良者而痛懲誣攀者廣東通志 新增

張祐字一德舍山人永樂甲辰進士授刑科給事中出守處州

威惠竝行以父喪去職明年麗水賊陶得二治山賊陳鑑等跳

梁猖獗朝令起復卽兼程單車入境喻以利害陳鑑乞降陶得

二亦願降矣會總兵某以檻車解陳鑑赴京得二懼遂合南山

賊王景參騷動祐親冒矢石俘其魁賊遂平加俸三級郡民立祠祀之括蒼周德琳有棠陰民謠錄載其事至詳江南通志 含山縣志

馬諒字子諒和州人宣德癸丑進士授吏科給事中正統閒歷山東右布政民有惑於後妻欲寘前妻子於法者諒謂之曰爾子凶德乃吾屬教令之失非爾父子之罪也其父感悟請釋還

為孝子入為戶部侍郎上撫安軍民五事恤民十一事疏皆切時務上多嘉納致仕歸一統志 山東名宦

王璽字廷用和州人父鎬以舉人授戶部主事居官廉慎處事精明晉員外郎璽成正統戊辰進士觀政戶部命賚金帛犒兩廣軍士授主事屢奉差督辦通州天津草東浙江鈔課及償督

紫荆糧儲皆有廉能之稱歷兩浙鹽運使盡釐宿弊同州王珍成化丁未進士令浦江亦有治聲江南通志 和州志

唐忠字以信含山舉人知密雲縣捕治豪猾請蠲水衝田糧民甚德之以艱歸貧不能給衣食江南通志

薛良和州人天順中知固始縣邑故有十二渠分流受水後為豪強併兼貧弱坐困良悉為修復嚴立限次其利始均一統志 河南名宦

胡澄字景濂含山舉人知甯都縣慈惠多善政秩滿民籲留之又三載遷甯海州同知以暴疾卒州人哀悼江南通志

武泉字舜弼和州人宏治癸丑進士授榮藩長史日進講讀勤恪盡職榮藩深加禮重江南通志

鄒應龍字公濟和州人正德辛未進士授戶部主事討河南流寇督餉給軍又從彭澤西征蜀盜率偏師進剿斬獲千計遷郎中尋出理遼東糧儲潔己奉公邊鎮竦服擢山東按察司副使



整飭霸州等處兵備痛懲積弛之弊軍政一新又剪除巨盜摧抑貴勢境內肅清民皆設位祀之

江南通志

班佩和州監生嘉靖閒知遂溪善剖疑獄民有殺三命屢年莫決者禱於神得盜賊竟正其罪又嘗檢人命知王鳳之冤立釋之眾驚以為神其明察多類此以績最擢去民攀留遮道豎碑以致去思

廣東通志 新增

萬慶字子餘和州人嘉靖己未進士授行人奉使楚中盡卻餽遺擢刑部員外郎有豪猾倚中貴勢犯私鑄罪諸司莫敢詰慶獨寘之法無所貸出守泉州計擒倭賊海濱獲安置學田濬溝溢有利於民者無不為不便者悉罷之乞養歸泉人立祠祀之

江南通志 和州志

魯嶺和州舉人嘉靖四十二年河陽知州實心愛民有爭訟理

諭解散亦不罰贖

河陽州志 新增

張尚儒和州人萬曆中以貢知巴東縣政最升歸州知州新灘有險石命工鐫鑿以便行旅人多頌之

江南通志

宋文清字大之和州人萬曆閒福建福州府教授為人溫雅樂易課士有功擢藩傳不就門徒立石以紀去思

福建通志 新增

魯可藻和州人崇禎末知新甯縣時值喪亂處以鎮靜民恃無恐嘗陳鹽法七條上官嘉異擢戶部主事

湖南通志

馬士達和州人崇禎中知興甯縣獻賊陷城士達計誅叛黨數十人復之

湖南通志

國朝成性字我存和州人順治己丑進士授中書舍人擢御史出按福建有清直聲轉兵部主事以薦擢兵科給事中前後四年章疏凡數十上皆切當利病

江南通志 和州志

李衷燦字藜仲含山人順治中以貢知洵陽縣遷冀州知州復補荆門州時有剿寇之師衷燦轉餉有勞績擢衛輝府同知問學於耆儒孫奇逢執弟子禮時人稱之一統志

張其善字同人含山人順治辛丑進士知東安縣民徭雜處素稱難理其善蒞官清惠境內翕然遷高州通判未任卒江南通志

王錦字匪奪含山拔貢知賀縣縣雜獠民貧役重錦加意撫綏疏通鹽引士民愛戴以乞養歸含山縣志

王濤字衡山含山人康熙中以拔貢薦赴河工效力久著勞績河工告成補兗州府通判屢攝曹州膠州陽穀縣等篆創建張

秋城學宮教育生徒文風蔚起以艱歸含山縣志胡騰虬含山人以貢歷萊陽韓城二縣丞潔己愛民以廉惠稱韓人立祠祀之江南通志

唐焯字融昭含山人以貢授清河訓導修學宮端士習人文興

起升知縣以熟諳河務補沿河縣缺得蘭陽縣潔己奉公辛勤撫字告歸南旋復以保題畱工修築山旰洪澤隄補通州州判

職兼鹽捕釐剔弊端奸匪絕迹致仕歸含山縣志張公望字賜履含山舉人知嵩縣導民開渠引伊河水以資蓄

洩親巡銀鑛以免侵盜革私派省徭役尤勤於造士坐累左遷歸含山縣志

唐冠賢字泰初含山人雍正丁未進士知孟津縣值歲旱力籌賑濟詳請貸穀二千餘石全活無算孟津士人素欽其文望相

率請正盡心誘掖多所成就補任縣告歸含山縣志張實字若園含山人雍正十三年知澄海縣綜練治理案無畱

牘莅任八載諸廢咸修邑有套子河縣互數里沿河田數千頃

常苦水患實築隄障之功成田乃大熟後人踵事增築一方恃以無虞至今民頌其績祀名宦廣東通志新以上舊志

張夢祺字蘭坡含山進士山東知縣歷任安邱東阿嶧縣抑豪強鋤奸宄理煩治劇舉措裕如時稱能吏調德平卒官含山縣志

胡長庚字少白含山進士由主事歷山東道御史稽查海運倉七疏條陳時事其豫儲倉穀一疏刊人事例出知雲南昭通府

汾州府民間有水清鏡明之頌含山縣志

范基棟字松崖和州舉人咸豐九年截取浙江知縣畱辦壽州防剿加同知銜十一年左宗棠檄赴衢營旋署青田知縣髮賊竄境率練勇日夜防禦擒捕土匪悉平之省徭平訟修建學宮

試院百廢咸理調嘉善卒官和州志

廣德州

宋李仲鼐廣德人任廣西提刑治獄多平反人懷服之兼提舉常平義倉茶鹽等事蔚然有聲南畿志

湯景仁廣德人熙甯中進士為甯國令以廉介稱人謂其所居地曰湯清村南畿志

倪濤字巨濟廣德人年十五試太學第一舉進士歷官司勳左司員外郎時議有事燕雲大臣皆心知不可無敢出口濤獨言其非且曰景德以來遼守約不犯邊盟誓固在不可渝也王黼怒曰君敢沮軍耶貶監朝城酒稅再徙茶陵船場死之明年金人犯關朝廷憶濤言官其一子有雲陽集傳於世宋史本傳

李嘉言廣德人隆興中進士嘗從范成大使北使事多從其議

歷知常饒二州皆有去思尋以尚書充使而還南畿志 江南舊通志

王廷袞字補之建平人開禧乙丑進士提點江淮刑獄不務苛虐人以恕翁號之歷官兩浙路宣撫性骨鯁論事不避權倖與

時忤乞歸廣德州志

吳應龍字雲翔建平人嘉定中進士初尉武進歲凶多所賑恤

遷知江甯升知興國軍治稱最入奏陳八事曰振綱紀信政令

惜名器厲人才擇牧守選將帥安流離惜饑寒理宗嘉納之擢

御史與同寮議不合乃以淮漕去官後起為饒州守遷江淮荆

浙福建廣南路都大提點阮冶鑄錢事復遷直寶謨閣廣南西

路轉運判兼提本路鹽事解組歸南畿志 江南通志

章汝鈞字和叔建平人淳祐進士授國子監書課官召試館職

首以厚人倫扶國綱為言以祕書正事家居里人多以差役破

家汝鈞與郡人梅應發力舉義役行之鄰郡取則焉後除祕書

郎一統志

梅應發字定夫廣德人寶祐進士居官中貞廉退秩至中奉大

夫直寶章閣致仕歸元初召起之辭以疾年七十八卒江南通志 廣

德州志

周承勳廣德人舉進士任新昌縣尉發奸戢盜民賴以安轉知

崑山縣南畿志 廣德州志

明錢魯南廣德人洪武三十三年知東鄉時兵戈雖息邑多巨

族驕悍如故魯南律已無私躬勤儉敦禮義以倡之民懷其德

彬彬向化江西通志 新增

胡虞字致恭廣德人幼喪父其母口授孝經論語輒能通大義

母死廬墓三年永樂初以歲貢歷事內廷擢工科給事中攝通

政司事成祖每嘉獎之九載升交趾按察司僉事仁宗以其久任近侍特畱之擢都察院右副都御史宣德中征交趾命督廣東漕運復命往巴蜀督軍民採林木措置有方既還改授福建右參政秩滿以老疾致仕一統志

杜述廣德人永樂中知慈利縣處已廉介賦役均平嘗入蠻溪採官木蠻獠爭來奉迎一境甯謐一統志湖廣南名宦

張政字平夫廣德人永樂戊戌進士宣德初以御史巡按山西時諸郡逋租至二百萬餘石政請隨土折納民大稱便斥貪除暴治行稱最就拜山西按察使風紀益振一統志山西名宦

章民望廣德人天順丁丑進士累官河南道御史初曹石專橫心疾之以秩卑無言責未發及為言官錦衣衛指揮門達恃寵作威福率同列劾之下達於獄宵小懼伏憲宗御極周太后弟

周彧與真定武陟民爭田郎中彭韶奉官往勘回奏忤旨下錦衣獄民望疏救之言者踵起遂得釋廣德州志

濮陽瑾字良玉廣德人以選貢知甯陽縣兩賑饑民全活甚眾委督通糧至誠勸諭民咸樂輸以親老乞歸百姓畱之遮道數

十里山東通志江南舊通志

姜洪字希範廣德人成化戊戌進士知盧氏縣擢御史孝宗即位陳時政八事歷詆太監蕭敬內閣萬安劉吉等而薦致仕尚書王恕王竑等疏辭幾萬言帝嘉納之而為所斥者憾不置出按湖廣與督漕都御史秦紘爭文移遂為劉吉所中貶知夏縣

遷知桂林府猺獠侵擾古田請兵討平之擢雲南參政土官陶洪與八百媳婦約為亂乘閒剪滅歷山東左參政遷山西布政劉瑾索賂不獲中旨致仕瑾誅起山東左布政以右副都御史

重刊後進志 卷二百  
巡撫山西卒諡莊介明史本傳

姜溥廣德人成化丁未進士宏治中知嘉魚縣邑瀕江多水患乃自百疋山作長隄至三角鋪二百餘里患乃息擢御史未任

卒一統志湖北名宦

吳盛字文郁建平人宏治己未進士知義烏縣政聲懋著遷南戶部主事出為湖州知府時孝豐湯許為寇盛深入其阻諭以禍福兵不血刃而寇悉平後備兵天津值武宗南幸歲大饑盛以無礙官羨錢給四方流民俾充夫役民不知擾改雲南屯田副使乞歸一統志

宗璽字朝用建平人宏治己未進士授南大理寺正時逆瑾肆虐多害善良璽平反不撓出為江西副使會副使胡世甯疏劾宸濠不軌十事濠亦以受金縱寇誣劾世甯將致之於辟璽奮

筆白其誣盜徐九齡聚眾攻掠設策斬之遷福建兵巡道平大帽山寇改廣西按察使復平叛獠歷貴州雲南布政使清公帑巨萬以贍軍旅卒於官一統志

劉必達號雲峰廣德人以貢官無錫訓導朔望集諸生課藝必構程示之一日課首華某故富家子其父來餽以金必達怒曰若貨取我乎擲金戶外拒其子勿再與課升民部郎以老乞歸

廣德州志

張金廣德人宏治中知岳州府築南津港隄禦水尤勤荒政湖南通志

濮陽鉞字廷威廣德歲貢任南東城兵馬司會有編戶命御史劉節辟為從事疏通敏達紛拏立剖世宗登極應詔陳言八事勤聖學慎始終持大體審好尚豐儲賦恤民用節民力省濫費

帝嘉納之以直忤當事罷廣德州志

潘潤字時雨建平人正德甲戌進士歷官儀部郎擢守處州當

道議增郡賦力爭而止比入覲民有餽遺堅拒弗受眾構卻金

亭以懷之遷雲南兵備副使江南通志

王世祿字子廷廣德人正德丁丑進士知麻城縣縣河衝擊為

患世祿別鑿新河以殺水勢為政簡易愷悌事不煩而民不擾

調象山歷瀘景二州守入為戶部員外郎居官清慎治聲藉甚

所至皆祀名宦一統志湖北名宦 江南舊通志

李成建平人正德開知泰甯縣時大帽山寇滋擾成嚴設防衛

城賴以全李福膺統兵討賊所過剽掠惟泰甯得成調劑無一

卒敢越利涉橋為害者福建通志

夏鶚字惟舉建平人正德閒官行都司斷事大同軍亂侍郎黃

綰委鶚分別情罪祇誅首惡十餘人被論去廣德州志

鄭相字廷佐廣德選貢知夏邑建熙熙臺延賢亭以接諸生河

溢躬畚鍤築隄防會有盜警以計擒之鄰邑頌德民尸祝之廣德州志

李崇謙字孔濟廣德人知分水縣發廩賑饑所活甚多興學繕

城均稅革里甲善政悉舉兩浙用兵徵餉無常崇謙盡心調劑

民以不擾胡宗憲平衢婺礦賊俘三百人命鞠之原其誘脅者

數十升吉安判未赴歸廣德州志

李得陽字伯英廣德人嘉靖乙丑進士知蘭谿縣遷戶部主事

權淮關盡蠲浮苛歷升九江知府築三洲隄建澄江樓葺苻息

警時柯陳氏本友諒遺種明錮之踞險為患得陽白當道擇其

文理粗諳者給以子衿學孽潛消遷廣南兵備副使以養歸起

補漳南道歷湖南左布政尋以都御史撫楚鏗成賦役全書永

為規式奏止荆沙衡永採木之害築黃梅城建天柱縣又乞養

歸起南工部侍郎會陵殿城諸工役並舉兼攝通政篆以勞卒

官年七十九贈戶部尚書

江南通志

李謨字子範廣德人嘉靖乙丑進士授刑部主事委漕運理刑

減稅二萬頌者載道擢吏部驗封司主事轉稽勳司員外郎為

銓曹第一廉吏

江南通志

濮陽江字致源廣德人官遼州同知鬻家產以濟邊餉擢臨江

府通判

廣德州志

夏宗思字以明建平舉人知雲都縣多奇績御史袁淳嚴嵩黨

也居鄉恣行侵併宗思上其事正其罪百姓祠祀之

廣德州志

楊大韶建平人隆慶元年以舉人知武緣縣治尚嚴明減值錢

以甦里甲置社學三十餘所立學田革攬納邑人稱快

廣西通志

夏良心字景堯廣德人隆慶辛未進士授刑部主事升山西參

議轉兩浙水利道築海隄費省功倍按察山東布政河南皆遇

饑歉賑貸有方擢江西巡撫時兩瑞權稅歲幾十五萬奏減七

萬有奇璫又欲開廣信銅坑山礦上疏力陳不可乃止加兵部

右侍郎卒贈兵部尚書勅建褒德祠以祀

一統志

李天植字性甫廣德人隆慶辛未進士授平陽推官擢吏科給

事中鄒元標趙用賢糾張居正奪情被杖天植疏救甚力有旨

選闈寺多人天植言儒士進學數少中貴選用數多事體倒置

語逆政府出參饒南道時毀天下書院欲併廢白鹿洞膳田天

植力持不可乃止遷湖廣副使察吏詰戎百務具舉延修撰張

元忬講學嶽麓惜陰兩書院造就甚眾轉四川參政歷曹濮兵



備以終一統志

呂正情字約之建平歲貢授平定州同知連攝州縣篆極力撫綏裁賦耗恤流移葺城堡嚴保甲所蒞皆有惠政去之日行李

一肩送者攀轅遮道廣德州志

管九皋字汝鴻廣德舉人知富陽縣崇教化勸農桑以卓異擢

御史歷官至陝西廣東副使捐俸卻餽一塵不染富陽廉州府

皆祀名宦江南通志

李徵儀字于來廣德人天植孫萬歷辛丑進士知弋陽縣調清

江賑饑建學具有實政擢禮部主事轉御史疏言鄒元標顧憲

成趙南星直諫蒙譴宜峻擢以備啟沃閱視山海居庸兩關兵

馬上便宜數事皆報可又疏劾李三才盜買皇木內監冒金磚

等費數十萬諫止修禁院臺榭皆允行巡視山東長蘆鹽政督

學畿輔歷掌十三道印升大理寺左丞以爭枚卜拂衣歸起行

人司司正魏璫用事以不附削籍璫誅原官起用一統志 史誌

夏之彥字士美廣德舉人知應山縣痛革徵收贏羨行戶供應

楊璉以直諫罹璫禍追贓下本縣承比之彥設櫃募金且鬻產

二千金代贖臺檄下璉幼子於獄為築別室居之名曰疾疾軒

時餽橐餽或危之答曰使某附楊公得禍天下萬世應有知我

者遷武昌府丞鑿壓霧嶺道五十里土人碑曰夏父嶺升浙江

鹽運司運同卻常例疏鹽引商民兩利江南通志

呂明倫字子上建平舉人知定海縣以廉允稱轉山東萊蕪有

巨惡元氏世為民害明倫翦除之百姓歌舞於道立祠祀焉升

烏撒軍民府同知廣德州志

夏元和字節之建平人以貢選茶陵同知升充州府通判權臨清關一意潔己榜廳事後云摘蔬尋別味種竹映虛心卒於官充人無不哀泣

廣德州志

甯瑞鯉字壽卿廣德人萬曆乙未進士知南豐縣歷城都府考最為清官第一擢浙江按察副使廣東廉使所至俱有惠政

廣德

州志

潘紹芳號登龍建平歲貢官海甯進賢二縣丞剔弊除奸遷知馬平縣革困民諸稅政立碑以為永例百姓歡呼徧於城野

廣德

州志

夏之時字士寅廣德舉人署含山學大成殿圯以家資千餘金重新之諸生藉以舉火者數十家卒於官士皆慟哭失聲執心喪焉

廣德州志

雲文彩號儀寔廣德人以貢歷知普甯縣摘伏如神案無留牘

升永昌府通判

廣德州志

王之棟字嘉隆建平人以貢選邛州僉判攝榮浦策二邑愛戴會討叛蠻督餉黎城瀘河諸處運夫多觸瘴道斃棟為死者掩

骸生者給醫藥以守正不阿左遷解組歸

江南通志廣德州志

王之講字嘉學建平人官慈谿簿佐理撫循精明慎密疏河流淤塞以灌田水旱無虞邑人為建生祠立碑紀事

廣德州志

甯用轍字叔由廣德恩貢知華容縣民苦浮糧設法徵輸民困稍蘇時豪衿恣橫用轍扶弱抑強民戴之如慈父卒年九十二

廣德州志

楊時春字茂先建平舉人授銅陵教諭捐俸葺學宮學前有玉帶河築隄瀦水升慈利知縣地逼麻寮美坪諸峒山獠出沒時

春恩威並用土人畏服調長沙以勞卒建平縣志

濮陽景旦廣德歲貢任海門訓導捐資建魁星樓賙寒士有成

季二生被誣應禡力辨雪之報以多金正色堅拒乙亥寇警維

揚官多別署奉檄守城早夜捍護致疾卒邑人號慟建碑紀績

廣德州志

嚴斌美字美生建平選貢任岷縣丞署縣篆廉而有守惠能養

民民甚德之廣德州志

戈簡字行可廣德人崇禎辛未進士知晉江縣謝絕請謁綜賦

汰役練兵積穀息海氛靖山寇皆有成績嘗為邑濬河濟運今

號戈公陂江南通志廣德州志

王重臣字叔葵建平人以貢授唐安州佐值流賊分三道寇蜀

渡白水破漢縣距唐安數十里刺史聞警推重臣任守禦乃集

士民修器械設方略因三江之險連營列寨賊不敢逼又攝篆

江油條具五難四苦為民請命江油民歌之曰父兮生我母兮

育我不有王令誰其植我及歸父老流涕送之立祠以祀建平縣志

國朝包元翀字拂雲廣德人順治閒以貢生知平陰縣時濟上屯

兵縣苦供億元翀區畫以濟民不知擾飛蝗入界虔禱之遂出

境一統志

張希哲號耐菴廣德歲貢司崑山訓順治己亥值京口之警眾

欲棄城去希哲集紳士為固守計歷官稷山知縣興學校嚴講

課時清釐漏賦按籍墾荒陽平里被困尤甚希哲力請得免編

審人丁輕徭平賦去之日邑民走送百里外廣德州志

戈啟斗字公明廣德歲貢授蘇州府訓導倡修學宮學舍薦授

義甯令邑多盜賊督捕有方捐俸代輸歲額去官之日行李蕭

然廣德州志

岑鶴字羽長建平人康熙甲辰進士知西華縣首禁奸民詭寄免差諸弊築扶溝張善口民甚賴之以艱歸起補河陰歲饑賑救有方無冒無漏擢鎮南知州升禮部郎中以疾歸廣德州志趙嗣晉字煥望廣德人康熙辛未進士知武城縣首重學校創義塾以訓邑子弟邑接定陶曹縣值汜陽雷澤諸水汎濫嗣晉濬河道五十里水患以息擢御史黃運二河夫役工食素飽蠹蝕嗣晉論之人沾實惠鄉闈同考官荒於簿書請加考試以藝工拙分內外簾著為令四十四年浙江福建江南山東四省死罪以下奉

旨減等發落嗣晉疏請直隸各省亦遵此例獲宥者不可勝紀廣德州志宗芳字漢臣建平副貢知建始縣兵燹之後人未知學芳力興

文教不數年簪纓相繼邑人祠祀之再任通許值歲歉陳請蠲賦民荷更生廣德州志

王逢龍字孟雲廣德人以貢教習八旗授山東鹽運判分司膠萊上下兩關有私派詳請勒禁委勘東省旱蝗捐錢米設藥局多所全活調杭州府通判以檄解耿逆家口至部行次蘇州卒廣德州志

巫樞孫字皇士廣德人康熙庚辰進士知桃源縣潔己愛民清剔陋規修學宮建橋梁聽訟用心平反惠政甚多廣德州志

王志援字宇濟建平人康熙丙辰進士知桂陽縣政尚平恕卻餽減耗課農養老以分校卒於武昌民為哀悼祀之名宦湖南通志

戴兆佳字士期建平人康熙丙戌進士知天台縣斷決若流登善良鋤豪猾振學校勵農桑清賦役釐保甲開義塾贍常平斥

淫祀修名蹟繕城浚隍埋骨瘞骸百廢具舉台兵燹後版籍脫漏按畝丈量錮弊頓清歲歉委賑三邑全活無算官終禮部員

外郎

建平縣志

宗高舉字一蜚建平人乾隆初由廩生舉孝廉方正司訓陽湖調淮安河淮漫溢檄委辦賑徧歷七州縣按戶親給吏不能奸

民沾實惠

廣德州志

濮陽樓字凌雲廣德人乾隆乙丑進士知三水縣地瘠民貧盡心撫字訓農勸學石關有馬厰地三十餘頃磽薄僅足輸賦樓詳減其四之三民始樂業

大兵討準夷道出邠州委辦臺站毫不累民後以磨勘被議邑人

如失慈父母焉

廣德州志

陳惇字九敘廣德舉人揀發福建初知古田調甯化地接清流

之董家嶺為積匪窟穴惇悉擒而置之法邑多虎患禱於神作檄驅之虎遠去擢判福甯署漳浦縣誅孫蔡兩巨猾邑賴以安

缺裁移泉州蚶江

大軍進剿臺匪軍裝糧餉率由蚶江渡臺縣係新立航舶甚少惇

盡心經理濟運無缺及凱旋署興化郡以積勞卒

廣德州志

劉丙字克齋廣德人宛平籍嘉慶壬戌進士知上高縣調浮梁浮梁瓷器甲天下丙自上供外不私一甌律身清潔斷獄精明升甯都州知州丙寄籍宛平時涇縣趙良壽以名進士官中書丙從之游故學行似之

廣德州志以上舊志

Blank columns for text on the right page.

重修安徽通志卷一百一

人物志

宦績二十四

六安州

晉何充字次道廬江灑人曾祖楨字元幹有文學仕魏為宏農太守入晉為尚書光祿大夫祖暉豫州刺史父叡安豐太守充風韻淹雅文義見稱初辟王敦大將軍府掾成帝時封都鄉侯出為東陽太守在郡甚有德政除丹陽尹庾亮王導竝薦充器局方概有萬夫之望由是加兵部尚書歷中書令建元初出為驃騎將軍都督徐州揚州之晉陵諸軍事徵入為都督揚豫徐州之琅琊諸軍事穆帝立充專輔幼主臨朝正色以社稷為己任卒贈司空諡文穆無子以弟準之子放為嗣放又無子以兄

孫松嗣位至驃騎諮議參軍

三國志注引文士傳晉書本傳

何澄字季年充弟準之子也起家祕書郎清正有器望累遷祕書監太常中護軍武帝愛之以為冠軍將軍吳國內史徵拜尚書領瑯琊王師安帝即位遷尚書左僕射典選桓元執政以病免卒於家安帝反正追贈金紫光祿大夫子籍早卒次子融元

熙中為大司農

晉書何準傳

何叔度準之孫也父恢南康太守叔度恭謹有行業姨適沛郡劉璩叔度母早卒奉姨若所生義熙五年吳興武康縣人王延祖為劫其父睦以告官新制凡劫者家人棄市睦既自告於法有疑叔度時為尚書議曰設法止姦本於情理所以罪及同產欲開其相告以出造惡之身睦父子之至而割其天屬還相縛送解腕求存於情可愍竝合從原從之後為金紫光祿大夫吳

郡太守

南史何尚之傳

宋何尚之字彥德叔度子也初為臨津令武帝領征西將軍補主簿從征長安還賜爵都鄉侯後拜左衛將軍領太子中庶子雅好文義甚為文帝所知以為丹陽尹立宅南郭外立學聚生徒謂之南學累遷吏部尚書嘗察范蔚宗意趣異常白文帝宜出之廣州帝不納後乃嘉其先見遷尚書左僕射諫止元武湖中造三神山又諫止行幸侵夜歷官尚書令侍中左光祿開府儀同三司尚之立身簡約車服率素執衡當朝畏遠權柄以中書令卒贈司空諡簡穆

南史本傳

何偃字仲宏尚之子也孝武時歷位侍中領太子中庶子時求讜言偃以為宜重農邝本并官省事考課以知能否增俸以除吏奸責成良守久於其職都督刺史宜別其任改領驍騎將軍

轉吏部尚書尚之去選未五載偃復襲之世以為榮卒於官諡

曰靖子戢字惠景選尚山陰公主拜駙馬都尉入齊官至吏部

尚書出為吳興太守卒諡懿南史何尚之傳

齊何昌寓字儼望尚之弟之子也仕宋為尚書儀曹郎出為湘

東太守還為高帝驃騎功曹歷位中書郎王儉衛軍長史儉謂

之曰後任朝事者非卿而誰臨海王昭秀為荊州以昌寓為西

中郎長史南郡太守行荊州事明帝將踐阼使裴叔業齎旨詔

昌寓令便宜從事昌寓拒之曰臨海王未有失豈得從君單詔

耶即時自有啟聞須反更議叔業曰拒詔軍法行事答曰能見

殺者君也能拒詔者僕也叔業不敢逼明帝聞而嘉之由是昭

秀得生還都昌寓後為吏部尚書卒於侍中贈太常諡曰簡南史

何尚之傳

何允字子季廬江潯人點之弟也為建安太守政有恩信民不

忍欺每伏臘縱囚還家依期而至梁書何點傳

梁何敬容字國禮昌寓子也尚齊武帝女長城公主拜駙馬都

尉梁天監中為建安內史清公有美績累遷守吏部尚書銓序

明審號為稱職出為吳郡太守為政勤鄙人隱辨訟如神視事

四年政為天下第一吏人詣闕請樹碑詔許之復為吏部尚書

侍中領太子中庶子太清元年遷太子詹事侯景渦陽退敗傳

者謂其已沒朝廷以為憂敬容尋見東宮簡文謂曰淮北始更

有信侯景定得身免敬容曰得景遂死深是朝廷之福簡文失

色問故對曰景反覆叛臣終當亂國俄而侯景難作襲建業敬

容自府移家臺內卒於園中南史何尚之傳

明先處良六安人洪武初以謹慎才幹舉授辰州通判擢平陽



府知府政績懋著卒於官賜祭葬萬姓統譜

王文質六安人洪武中知宣城縣時兵革初定撫綏招徠教士

勸農民始安集乃建縣治徙縣學於泰和門內宣城縣志

張子貞字彥城英山人洪武中由國子生授車駕司主事進員

外郎以言事謫戍嶺海復起遷山東僉事以切直忤時謫隸苑

馬寺太祖見其題龍江衛詩詔復其官升浙江右參政敷歷中

外幾四十年清心苦節寵辱不驚尚書蹇義嘗歎曰居官不必

遠法古人近效張子貞可矣一統志

白春字應亨六安人永樂丙戌進士授御史糾舉協宜人無敢

犯出按四川時有中貴解皇木為民害春疏其罪詔論死又嘗

監理邊餉軍民德之乞養歸六安州志

潘岳字居仁六安人永樂中以舉人歷授御史彈劾不避權貴

忤旨發充後軍都督府掾府帥優禮之岳曰非朝廷意也執役

無異羣吏起按浙江監督銀場盜屏民輯再按福建單騎問民

疾苦暑日手自持蓋致仕歸置田給族人以承庸調一統志

楊昇字繼明六安人宣德中以舉人授陳州知州前守李為器

訟者所誣昇聚父老於庭曰李守為民造福以懲惡受誣汝等

良民盍據實上聞眾感泣為白其冤李得復任昇改授光州士

民遮道涕泣既抵光教養並舉訟簡役清值歲祲多方賑濟民

以不困卒於官祀名宦六安州志

胡晨英山人正統末任福安縣丞時鄧茂七倡亂晨備禦有方

邑賴以安景泰初歲祲晨稱貸於富室不足乃盡借存留倉米

發賑同官欲申請晨曰請則動經旬日民死過半矣有罪晨自

當之全活無算一統志 建名宦

單瑛六安歲貢知青田縣廉明勤慎茹糲飲冰致仕歸囊無餘

物六安州志

汪霖字潤夫六安人景泰甲戌進士授御史按雲南浙江振紀綱洗冤滯成化時監征粵軍升大理寺丞以左僉都御史巡撫畿內兼飭薊州等處邊關修城垣塞蹊隧儲器械謹烽火凡八受璽書獎諭生平寬厚謹慎為時所稱

江南通志

潘楨字景澂六安人岳之子也天順庚辰進士授御史亮節直聲為時所推累遷福建副使覈銀課加耗重息以補他課之逋升四川按察使出滯獄鋤豪僧晉布政使貴州苗亂徵兵餉於四川一時莫知所措楨請以苗攻苗檄近疆播州龍州之卒應之咸服其有應變之才會中貴藉上供名責帑銀三千市土物堅持不予得謗歸

一統志六安州志

朱賢字從善六安人天順庚辰進士授御史每抗疏切諫後復

陳言宜多取進士以備任使上以為干譽下錦衣衛獄謫四川

花林水驛丞起巡按福建風紀肅然

六安州志

楊忭字節夫六安舉人知汲縣清謹有守升東平州知州從弟

惇字載夫成化己丑進士知浦城縣有逋寇時出為旁邑害惇

親搗其巢穴寇悉就擒累官至光祿卿

福建通志六安州志

丁佩字大用六安人宏治庚戌進士授南刑部主事有兄弟訟

產問曰汝年幾何曰六十曰有子幾人曰無有曰汝欲誰遺乎

其人不能對兄弟感泣而去升兵部郎中凡驛傳廩牧諸政各

有條理雖權貴不私給一船一騎為時所器重

六安州志

潘鏜字宗節景澂子也宏治丙辰進士有孝行為滿城知縣以

憂歸繼知滑縣擢御史首陳時務大計四事曰審大勢權時宜

重將權倡士氣孝宗嘉納之正德初以論中人高鳳除名八年

明史趙佑傳  
起廣東按察司僉事謝病歸  
江南舊通志

彭辨之字問夫霍山人正德戊辰進士知餘杭縣時逆瑾舞權

浙省困於織造力請裁之民得不擾擢工部主事進郎中出知

饒州府政靜民安調彰德清聲益著晉山東參政

浙江通志

潘銳字宗魯六安人正德丁丑進士授行人伏闕諫止巡幸廷

杖謫南京國子監學錄嘉靖初復職復許當事大臣罪尋又以

言事下詔獄後放歸子子正字汝中嘉靖壬辰進士擢給事中

論罷冢宰汪鋮謫西安縣丞累遷湖廣兵備討平苗亂遷貴州

參政歸

一統志  
江南通志

黃金字世重六安人以國子生知光化縣禦盜賑饑修志息訟

謀甃城垣浚隍得輒盈萬石上有字曰許光化借用人咸異之

以病歸士民攀留不得記之名宦

六安州志

張諧字允弼六安人嘉靖丙辰進士授主事督漕湖廣有聲出

知桂林府築關亭謹斥堠製火器蠻賊來寇者皆大創遂升山

東鹽運使力汰諸弊擢雲南布政司參政場官十餘人負贖課

當死捐資活之又先事預防徙鑛側土夷之不靖者告歸祀桂

林名宦

六安州志

邱雲漢字天章六安歲貢知宜章縣清勤廉幹時苗多不靖雲

漢收熟苗之近縣者分編里甲加意撫綏以為禦苗遂不敢犯

界

六安州志

邱玳字文玉六安人嘉靖戊戌進士授戶部主事餉軍榆林一

洗扣除剋減之弊晉郎中出知溫州海上巡徼者輒誣漁販為

盜悉原而釋之調守甯波見城郭頽敝急繕築堅固後倭患熾

城賴以全初榆林之役妻訃適至玳曰此豈顧家時耶其急公盡職類如此

六安州志

羅欽字明泉霍山歲貢通判南康監燒御窯陶人挾邪術逞淫祀器有苦窳或掠童男女以祭欽廉得之悉寘於法乃自以羊豕祭窯器成有異大憲取以入貢上曰除積惡通神明良有司也升南康知府

六安州志

劉化龍字在田霍山拔貢知衡水縣建崇文閣以造士衡苦水決捐俸築隄土人名曰劉公隄歲旱設賑全活甚眾後升鞏昌府同知

六安州志

牛愷六安人嘉靖中以舉人知石首縣聽訟明決承天府營陵諸司罹譴愷區畫周詳縣人賴之升知眉州

一統志湖北名宦

徐必進字鏡州六安人嘉靖丙辰進士授福州府推官擢禮部郎中出知嘉興府郡人戴之如神君升福建按察司副使尋告歸嘉興三塔寺有五太守祠必進其一也

江南通志六安州志

楊人臣字汝忠六安人以國子生官南海縣丞數攝縣篆稱廉能中貴稅課珠池漁獵百姓人臣從容調劑不激不隨紛難以解

六安州志

閻朝中字霽字英山拔貢同知興國州署州事盡祛諸弊時鑛事方殷委曲調劑民尤德之子一言字文石以舉人知甯德縣潔躬愛民卹災興學擢南戶部次子一本以恩貢官福安縣丞戢奸撫懦邑人德之遷思南府經歷

六安州志

張希皋六安進士萬曆六年令電白廉潔仁愛緩刑節用建學宮濬城塹嚴鄉約集流亡辨誣省訟囹圄空虛均畝定賦奸豪伏匿猾胥舞文必刑齊民誥誤必釋赴召之日行李蕭然父老

感之 廣東通志 新增

王應朝字我辰六安人萬曆中由舉人知嵯縣立意釐剔姦猾屏跡而不事繁刑堂清如水 浙江通志

黃元立字可予六安舉人知詔安縣聽斷明決每斷訟必筆之於書曰可對蓋以天日自問也漳州近海多盜有鄭某者謀不軌以計擒之請於兵巡曰縱此不可復得後竟脫去聚眾掠境

人始服其先見 六安州志

何慶元字長人六安人萬曆戊戌進士授工部主事分司高郵築隄以便漕洩漕運無滯商民便之祀七賢祠升雲南兵備乞

養歸 江南舊志

楊啟震字春鳴六安人以兵馬司指揮出為南豐縣丞兩署縣事南豐巨族曾某奪民產啟震追還之一縣稱服遷桂府審理

正引疾歸 六安州志

宋之楨字子德六安人萬曆戊戌進士授福州府推官折獄如神有何某者以漁色致三命而之楨座師之至戚也以竿牘至

之楨曰吾師豈肯為此竟置之法遂以此免官 六安州志

楊四知字畏生六安人崇禎戊戌進士知漢陽縣遇旱捐賑平糶歲不為災調黃岡襄陽治稱最擢御史上疏陳江北被寇之

慘兵將玩寇之弊請於皖廬增設開府監司與楚豫相犄角又上銓政京營漕運及被寇地方求改折色等疏俱允行巡視兩

關以勞卒官贈太僕寺少卿 江南舊志

張孫振字公武霍山人崇禎戊辰進士知歸安縣攝烏程倡七議次第行之兩邑皆請勒石以為永式升兵部主事擢御史巡視中城蘆溝橋皇城剛介莫敢犯代巡山西大閱武備賊至值

隆冬壘冰為城刻木為礮以禦之後以糾劾權要下獄復起為

御史升太僕少卿告歸

霍山縣志

祝啟庸字穉登六安人崇禎甲戌進士授真定推官執法明允

不避權勢考滿有五聽簡孚三章平恕之譽

六安州志

郝錦字綱卿六安人崇禎丁丑進士知豐城縣縣賦甲江右錦

至覈包攬清里甲裁陋規政為一時最調補新建獻賊擾袁吉

士民逃竄錦調兵食治守械眾心乃定擢御史侃侃有諍臣風

江南通志

陳爾善字元之六安人崇禎中以貢知雲陽縣險遠寇梗叱馭

勿顧歷夔州府知府保境安民

大兵定蜀爾善披僧服款軍門給符而還年已八十矣至家謁祖

墓二日而卒

六安州志

楊志仁字依之六安人以貢為建德訓導歲饑令蒿目束手志

仁倡募分賑流離得生轉東平州學正士民泣稟兩臺請授本

縣令巡撫巡按交章奏畱力辭不就祀名宦

六安州志

程音字北捷六安人以貢知麻仁縣時兵戈擾攘民無甯晷音

弭盜賑饑建倉修學邑賴以安

六安州志

余名鯤字北溟霍山歲貢任東昌府訓導闖賊圍城設方略佐

守令守禦有功升邱縣知縣邱復被圍誓神死守城得不陷

六安志

州志

國朝徐致章字君裴六安人順治乙未進士授工部主事權稅杭

關興水利減商課公餘推轂才俊再權清江浦專督漕艘先時

營造之費率中飽於黠胥致章刻期給發毫無侵牟准人德之

調考功員外郎請假歸遂不出弟致覺字先仲順治己丑進士

選庶吉士授編修甲午典試楚闈所得皆知名士引疾歸

江南舊通志

馬之光字實符六安舉人順治初由通州學正升知修武縣捐

俸修韓昌黎祠正供外悉除陋規民咸感德卒於官子晉錫康

熙癸卯解元

六安州志

左圖字極符六安舉人任大同府推官廉潔自守屬吏不敢餽

遺郡大猾某贓四萬餘地方多被振害屬圖追比為籲陳免累

一郡頌之嘗詳正恆山祀典在渾源之南眾咸重其經術

六安州志

王孫蘭字晚嗣六安歲貢知永安縣時土寇嘯聚從數騎造其

壘諭以禍福悉解甲降苞苴陋習一切屏絕升西安府同知

六安州志

駱士憤字子發六安舉人由常熟教諭擢郎陽府推官多所平

反郎人口祝之升柳州府知府柳有舉人余良桐婦妬妾有身  
被逐士憤為贖還生二子名之曰駱生駱成致仕歸郡人為建

祠一統志

汪浴日號普水六安人順治丁亥進士知陽武縣地濱黃河汎

濫為災浴日鳩工築隄種柳以防衝鬻民用不擾弟麗日號涵

萬以拔貢授推官改平遙知縣歷升邵武府知府戢盜賑饑建

倉修學奉檄至會城籌辦軍需以百萬之儲身任其事恢恢有

餘全省賴之不僅澤溉一郡也

六安州志

王廷藩字价人六安舉人知彭澤縣修古蹟葺黉宮纂邑乘崇

尚文教推挽孤寒清丈蘆洲墊解通賦均平徭役率多惠政

六安州志

駱循理前明六安衛百戶以武舉授徐州守備值河決多方捍

禦造木簞竹筏全活數千人擢天津遊擊旱蝗有儲米數百石  
盡發以賑全活無數

國朝定鼎歸誠加副總兵都督僉事致仕

六安州志

韓獻字公碩六安舉人知古田縣釐革弊政惠愛及民坐累降  
級同州潘德新字以平以歲貢任休甯訓導循循善誘多所造

就

六安州志

聞道字吉旋六安歲貢為沈陽訓導日與諸生會講以文行相

勸切屢署縣篆得上考督撫欲特薦之以老辭弟介祥字以庶

以歲貢授六合訓導攝縣篆歲凶賑饑民沾實惠

六安州志

汪溶日號鏡水六安拔貢授偃師縣丞勤於吏治委署陝州請

免浮糧遷普甯知縣鄰境山寇竊發會剿負固溶日奉檄往諭

尋即解散擢賓州知州又調養利州歷任如一

六安州志

沈惟芳字蘭若英山人順治中以貢授崇明訓導歷知豐城縣  
潔己惠民歲荒力請得免賦二萬又捐俸修壞隄八處巡撫欲

特薦之以疾辭歸

六安州志

蕭汝榮字茂公英山人以貢授潛山訓導遷教諭修學宮勤訓

課遷通許丞奉檄清丈陳州屏絕餽遺釐剔諸弊陳人德之同

族蕭汝藿亦以歲貢由海門訓導升知興甯縣多惠政卒於官

六安州志

王維藩霍山人順治中以拔貢官內閣中書升戶部員外郎權

稅蕪湖關淡泊自矢國課外不染一塵商民感戴復典倉差收

放平允頌聲載道

六安州志

邱時成字秩西康熙丙辰進士知鄆縣專心撫字邑有室女罹

中菁謗遭壻棄到公庭察其女殊端莊委曲詳訊果雪其冤諭



重刊安徽通志 卷一百一  
令完聚眾服其明擢刑部主事晉員外郎典試河南未行卒

六安

州志江沂字謂伊六安廩貢歷任蕭縣教諭適黃河泛溢邑宰知其才躬請襄理沂乃至鴻溝相度備禦俾泛溢之處皆為良田

六安

夏聲字秦重六安舉人為吳江教諭訓迪經史造就宏多會歲

災檄任賑事所至婦子歡呼

六安州志

王夢求字肖巖霍山人維藩孫也幼補諸生以事陷囹圄廬守王辨其冤猶褫衣巾康熙己卯以光州籍發解既而嚴查冒籍自首除名漫游川廣適有邊警應大帥募以斬獲賊渠擢守備復棄去過景州至王守家王愛其才妻以女且為捐復科名謁選得知永興縣勤撫綏嚴守禦恩威並著升知郴州潔己愛民

廉明慈惠之聲溢於南服調桂陽州乞養歸囊橐蕭然卒年八

十五

六安州志

鄧鈺字佩蒼六安人雍正甲辰進士知邵陽縣苗民不靖守帥惶惑鈺單騎往諭咸悅服調湘陰署寶慶府乞養歸

六安州志

閻純璽字文侯六安人官刑部主事歷升工部郎中出為廣西左江道兩攝按察司繁疑獄立判有思明土司鄧橫三寨為逆地極險阻左江總兵以疏防致敗改委右江鎮而以純璽參謀賊悉就擒安平甯明兩州先後因事聚眾大僚欲以兵剿純璽設法拘其魁事遂靖致仕歸

六安州志

陳兆楊字蜚雲霍山人雍正七年以拔貢揀發山東署鄒平縣丞歷知六縣築竝有政績而署肥城時奉委購辦十三經二十一史頒發通省尤著賢勞實授清平知縣以驗鄰邑旱災殫心

踏勘冒暑致疾而歿時論惜之

六安州志

楊友敬字希洛六安貢生性孝友親歿廬墓三年乾隆元年舉孝廉方正授六品服為太和教諭立程式勤講課敦崇實行多士咸奉楷模歲災分任賑務愷惻周詳羣黎戴德以老歸卒年八十七

一統志

孫捷字天秩六安武舉人授山西大通衛掌印守備時衛新設簿書錢穀一切部署條理秩如尤以教養為先務請於上官設學課士潔己惠人信孚於眾解組歸士民有送至百里外不忍去者

六安州志

程密字用詳六安拔貢授知縣署歷城鉅野丞值歲荒屢辦賑濟實心實力民頌其德題補淄川縣聞母病即引疾歸

六安州志

楊逢源字伸吉六安人乾隆甲戌進士知武緣縣清奸蠹寬徭

役時修城垣竭力監視後以緬匪不靖營辦軍差兵民並戴坐

累歸清苦如貧士

六安州志

祝應權六安人官應州知州廉慎敏勤興利除弊士民頌之後補祁州值歲饑傾囊助賑極意撫綏旱蝗四起捐俸募民撲滅清理案牘常至夜分以勞卒官

六安州志

馬坦字龍山英山人以貢知鄖縣地僻俗敝多所興革親歷田間勸民力作嚴立會課諸生皆知向學獄有死囚三人疑其冤覆訊得實力請釋之自是鄰縣大案多見委鞠平反甚多以疾歸士民餞送數十里不絕

六安州志

楊漢字清遠六安廩貢官震澤訓導日以文行與學者相砥礪士以漕務與縣令爭力止之事得寢令謝千金卻勿受士寒峻者免其贄且贈以金以艱歸起補金山學立式勤課化導蒸蒸

卒於官

六安州志

黃本騏字宣駟六安人乾隆乙未進士初以挑選任黟縣教諭後補廬州府教諭以敦倫明經爲諸士訓士貧而來學者周之奉檄辦泗州鳳臺災賑慈愛公勤全活無算老幼皆焚香送之卒於官廬士私謚曰文惠

六安州志

楊志偉字冠儒六安人授博白縣典史遷都結州吏目清約自持勤敏供職鄰盜脫逃以密計察獲俾署懷集勤政愛民革除積弊卒於官

六安州志

黃憲裔字性澄六安拔貢授湘陰縣丞縣有巨盜乘夜密捕之事遂平又富某有逃婢潛詣一生求救富某誣以姦拐生泣訴憲裔諭某服而退湘陰人服其明決至今德之

六安州志

許嗣臨字觀軒六安副貢試用教職所至勤講課勉諸生以實

行遇歲災協理賑務民沾實惠後選通州學訓導卻貧生贊且贍以俸委查沿沙田不爲己利撥入紫琅書院作膏火資有諸生與富室訟田生負屈褫力爭之富餽以金不受爭之愈力生得直復衣巾一郡頌德乞養歸

六安州志

王作謀字心鑒六安舉人官奉賢教諭邑有肇文文游二書院經費不足山長不能時至作謀代爲講閱且以應得監院公費添給諸生膏火一時人文興起學宮久圯勸捐重修時已病篤猶督率工匠不懈事甫竣遂卒士人私謚文介

六安州志

胡枝蕙字德揚六安人以例授直隸趙州知州直隸賦輕差重枝蕙爲節省徭役吏無染指決獄平允惟於娼賭盜賊不少貸升鳳邠水利鹽法道絕夤緣裁陋規四署臬篆刑獄稱平陝西鎮山曰太白高二百三十里枝蕙以禱雨步行至巔雨立沛岐

郟廂匪滋事馳赴岐山彈壓核軍實練義勇士民安堵事竣以軍功加級候升而疾已亟乞休歸卒六安州志  
金光悌號蘭谿英山人乾隆己丑以舉人授內閣中書庚子成進士癸卯充江西副主考遷宗人府主事歷刑部員外郎中己酉充廣東正主考以事鐫級嘉慶初升郎中累擢光祿寺少卿內閣侍讀學士為山東按察使升布政使入為刑部左侍郎屢奉

命審訊諸大案

恩予紀錄二次授江西巡撫以江西積案繁多請設局清釐並請借項修理建昌縣永豐蘆鎮等處圩隄以衛民田皆如所議

允行尋擢刑部尚書卒於官奉

旨照尚書例給卹

採行

程在嶸字冠雲霍山人乾隆己丑進士知賀縣委辦滇銅三載始回任值小竊株連吏誣為盜署令已出詳在嶸審得其情力為開釋得免死者十有八人委署宜山亦有惠政擢署永康州地瘠民貧教之開墾樹藝獎厲士習農不啼饑士知向學解組歸三州縣民皆送至境外霍山縣志  
汪玉林字蘭溪霍山人乾隆乙卯進士授工部主事歷升郎中出為山東督糧道裁陋規釐積弊德州衛守備為仇誣以匪黨議極刑力為稟請覆訊冤得雪全活一家以勞卒於官巡撫為之特疏奉

上諭原任已故之汪玉林勤謹有餘殊堪悼惜霍山縣志以上舊志

楊懌曾字成甫六安人楊葉之季子也嘉慶辛酉進士由編修歷左副都御史稱言職以憂歸訪有關吏畱難困戶居奇婦女

燒香等弊服闋疏請

諭禁游擢兵部左侍郎署尚書奉

命查辦鹽務尋授湖北巡撫疊辦水災捐廉助賑卒於官鄂人祠祀之

六安州志  
以下新修

金光恆字以軒英山拔貢五河教諭署宿松賑卹水災饑民萬

餘人繞郭呼號城閉光恆出城曉諭解散而去

英山縣  
舊志

王蘭新字春浦霍山進士廣東知縣道光中署電白平聚眾爭

鹽利之變補惠來修書院捐膏火折獄勸農平徭寬賦士民設

位祀之

霍山  
縣志

沈道南字午樵霍山優貢建德訓導修復蘭臺書院課士經史

勉以實踐漕獄興密請懲首惡釋株連保全善類多人升壽州

學正卒

霍山  
縣志

吳廷棟字竹如霍山人由拔貢官刑部游升郎中授保定知府  
歷山東布政使轉大理卿累擢戶部侍郎以乞休歸卒於家當  
廷棟官郎中時崇文門副監督奏獲長興店私酒三十六家交  
部審辦承審者擬人予滿杖而案犯以枉斷呈訴乃改派廷棟  
等覆訊究出監督家人詐贓情弊先將大概情形具奏奉  
硃批嚴斥會廷棟以京察引

見因歷陳長興店非崇文門所管既非私酒亦非漏稅其人實無罪可  
科而家人詐贓應按例懲辦反覆幾數百言後卒照原擬奏結  
及官布政使戶部以大錢壅滯奏奉

諭旨飭下直督於錢糧內兼收三成並有若不奉行私收實銀以枉法  
贓論之語會廷棟入都

陛見因歷陳大錢窒礙難行官民交病又反覆千數百言後直督譚廷

襄與諸郎會議遂得停止廷棟與有力焉廷棟篤守程朱之學著拙修集十卷與先儒性理諸書多所發明

文宗嘗問軍機大臣今之留心理學者郝篤藻以倭仁及廷棟對因是有吳某學問結實之

諭同治三年金陵克捷廷棟上請加敬懼一疏大旨謂治亂決於敬肆

敬肆根於喜懼人主喜心一生則驕心已伏而臣下之諂諛蒙

蔽夤緣因之其生平忠愛之忱老而彌篤如此曾國藩所作傳

泗州

漢韓牧字子白臨淮人善水事哀帝時為御史平當領河隄奏

言九河今皆寘滅宜博求能浚川疏河者牧以為可略於禹貢

九河處穿之縱不能為九但為四五宜有益時王莽但崇空語

無施行者漢書溝洫志新論

魏陳矯字季弼廣陵東陽人太守陳登請為功曹深相敬友郡

為孫權所圍矯為登求救於曹操圍解操辟為司空掾屬至魏

郡西部都尉曲周民父病以牛禱縣結正棄市矯曰此孝子也

表赦之遷魏郡太守時繫囚千數至有歷年矯自覽罪狀一時

論決黃初初封高陵亭侯遷尚書令明帝即位進封東鄉侯車

駕嘗卒至尚書門矯跪問曰陛下欲何之帝曰欲案行文書耳

矯曰此是臣職分若臣不稱其職則請就黜退陛下宜還帝慚

回車而反其亮直如此加侍中光祿大夫遷司徒卒諡曰貞子

本嗣歷位郡守九卿所在操綱領舉大體能使羣下自盡遷鎮

北將軍假節都督河北諸軍事卒子粲嗣三國志本傳

晉陳騫臨淮東陽人魏司徒矯之子也仁厚有智謀起家尚書

郎遷中山安平太守並著稱績歷官都督江南諸軍事徙都督

荆州諸軍事自安國亭侯進封郟侯武帝受禪以佐命勳封高平郡公遷侍中大將軍出爲都督揚州諸軍事攻拔吳枳里城破淦中屯戍賜其兄子惔爵關內侯遷太尉轉大司馬乞骸骨賜安車駟馬以高平公還第卒年八十一贈太傅諡曰武子興

嗣晉書本傳

齊劉元明臨淮人有吏能歷山陰建康令政常爲天下第一終於司農卿後傅季珪子翽亦爲山陰令問元明曰願以舊政告新令尹答曰我有奇術卿家譜所不載臨別當相示既而曰作縣令惟日食一升飯而莫飲酒此第一策也

南史傅季珪傳

宋許遵字仲塗泗州人第進士擢大理寺詳斷官知長興縣水災民多流徙遵募民出米賑濟竟得無患益興水利漑田甚博邑人便利立石紀之入爲審刑院詳議官出知宿州登州累典

刑獄詳敏明恕熙甯間又知壽州潤州致仕卒年八十一

宋史本傳

朱選天長人仁宗時知河中府忠厚有守上稱爲長者

一統志山西名宦

李植字元直泗州臨淮人兩舉於鄉從父中行客蘇軾門太史晁無咎見之曰此國士也以女妻焉靖康初高宗以康王開大元師府河南向子諲轉運京畿時盜起路阻使植督犒師銀百萬糧百萬石招募忠義二萬餘自淮入徐趨濟卒以計達高宗大悅授承直郎留之幕府三上表勸進爲汪伯彥黃潛善所忌出知湘陰縣張浚督師江上薦爲鄂州通判平大盜馬友孔彥舟歷尚書戶部員外郎秦檜當國植勾祠去杜門十九年檜死向子諲以戶部尚書居邇列召除戶部郎中帝曰我故人也方有意大用以母艱歸葬哀毀廬墓有白鷺朱草之祥劉鎮遺之

書曰忠臣孝子元直兼之矣服闋以薦差知瓊州帝憫其老改

徽州徽俗尚淫祠植首以息邪說正人心為事民心為變徽俗以下

舊志別載徽州府名宦今移并歷知鎮江府遷江淮荆湘都大提點院治鑄錢

公事金人敗盟授河北路計度轉運使乾道二年以江南東路

轉運知建康宣府兼本路安撫使上疏言防江十策帝嘉之召

赴闕以疾不克上道遂致仕宋史本傳

元萬聚泗州人至元閒知浮梁縣恤民興學百姓安之嘗謂家

人曰民頗德我死必葬我於斯子孫如其言葬於治東江西通志新

增

明鄒魯盱眙人洪武初以薦授河南主簿坐累降會稽典史者

民奏其廉能升知縣執法不阿為人誣奏逮至刑部事直特升

大理寺丞江南通志

王晏盱眙人以薦授教職升滋陽知縣廉能有節概博學多聞

仕至陝西參政江南通志

唐鐸字振之虹縣人太祖初起即侍左右洪武元年克延平以

鐸知府事拊輯新附士民安之入為殿中侍御史復出知紹興

府御下以誠凡徵賦有非土產者悉奏罷之餘姚上虞爭夏蓋

湖水利經歲不決斷以至公民皆悅服召拜刑部尚書調兵部

初置諫院以為諫議大夫請豫教元良為宗社萬年福初置詹

事即以為詹事仍食尚書俸以鐸嘗請豫教故也進太子太保

楊文南征參議軍事相度形勢增設諸衛皆從之卒於京師命

有司護喪歸明史本傳浙江通志

張彥禮五河人洪武中以人才徵知陽武縣多惠政秩滿民詣

闕請畱在任十八年卒於官囊橐蕭然不能歸里因家其地江南



通志

王文德盱眙人洪武閒為浮梁令正版籍以均力役覈田畝以

江西通志 新增

正稅賦興學校以敦孝弟民到於今稱之

金純字德修泗州人洪武中以薦授吏部郎中出為江西參政

永樂初召為刑部右侍郎從巡北京遷左侍郎命與宋禮同治

會通河又同徐亨蔣廷瓚濬魚王口黃河故道初太祖開塌場

口通河於泗又開濟甯西耐牢坡引曹鄆河水以通中原之運

至是純疏治之自開封北引水達鄆城入塌場出穀亭北十里

為永通廣濟二閘改禮部晉尙書致仕卒贈山陽伯

明史本傳

陸愉泗州人永樂二年知六安州勤學興禮盜息民安秩滿州

人詣闕懇畱復任

江南通志 舊志六 新安州名宦 新移

丁甯字惟和五河人永樂甲辰進士宣德七年巡按廣東風紀

大振嘗以盛暑巡邊過梅關軍役疲渴不能得水乃躬披荆棘

閱水脈偶見石澗命鑿之不踰尺而泉溢遂浚焉名曰福民泉

江南通志

許通泗州人正統閒知平定州剛果善斷吏畏民懷

山西通志

陳翌虹縣人正統丙辰進士授主事時征兀良哈命翌往永平

豫備芻粟區畫有方民用弗擾復齎白金數萬往遼左糴粟實

邊事竣升郎中尋奉命督漕江右聞父喪歸有旨俾卒事乃趨

至家治喪訖督漕至京乃歸終制起拜山西布政使政聲藉甚

擢右副都御史巡撫甯夏繕甲兵固城堡寇不敢犯升南戶部

侍郎因災異上寬卹民力等疏晉南戶部尙書以疾卒於官

泗州志

劉端泗州人景泰七年由選貢丞象山以節愛稱令缺署篆久

重修安徽通志 卷一百一 人物志 宦績

泗洲

民甚德之雅善堪輿曰象山仁里也遂卜居城北入籍焉子景

宏治閒舉人歷吳縣令升岳州通判浙江通志新增

陳道字德修盱眙人天順甲申進士授文選司主事歷南刑部

郎中清謹奉法訊鞫明審出知金華府能斷大獄釋株連獄垣

有古梓頗煽妖異道命伐之會病瘧眾諫止乃決伐之而疾愈

擢江西參政歷雲南陝西布政巡撫河南晉南刑部尚書卒贈

太子少保賜祭葬江南通志盱眙縣志

陳敏字內修天長人成化中以舉人知鄆縣縣多虎患敏禱於

神虎遂遠去調連城興起文教躬自誨迪連城科目久缺至是

遂多登第者湖南通志江南通志

陳大章字明之道之子也成化甲辰進士授刑部主事歷兵部

職方郎擢太僕卿長於吏治所在有聲兼工詞翰書畫為一時

推重江南通志

朱祥盱眙人成化閒以青州推官擢知陳州勤明有為仁慈撫

下興學校捍水患稱一時賢守一統志河南名宦

王楫字洪濟虹縣人成化戊戌進士授主事升戶部郎中遷參

政居官清慎厲風節士大夫賢之泗州志

李嶽字維嵩五河人宏治癸丑進士觀政吏部擢御史巡按京

畿察冤燭幽剗煩斷疑劾貪墨條陳天下大利多見采納出為

四川僉事屢決疑獄擒夾江橫梁大盜以艱歸遂不復起五河縣志

張昊字朝元天長人宏治丙辰進士知烏城縣擢御史巡按下

江會兵誅海寇施天泰鈕東山升江西僉事分巡九江時姚原

洞蠻寇亂昊與參政董樸討之斬獲三百餘人欲搗其巢約董

進兵不至為賊所執不敢加害委之而去回籍聽勘廷議復職

子天駙字雲卿以舉人任宛州府通判不持一錢歸江南通志

韓福天長人宏治中知大名府自罷兵戍盜稍起福定諸州縣

番上之法躬親團操又時詢察盜賊屏跡道不拾遺鼓樓下置

一認物亭令境內見道上所遺物一錢以上悉投亭中許亡者

認取諸州縣吏民以事詣府者率投衣囊亭中事畢各持去聞

有過旬者吏民不敢取也在任八年治行爲天下第一賜宴光

祿兩人覲朝中吏士夾道指之曰此大名韓知府也以比宋包

拯云一統志直隸名宦

李紹賢字崇德泗州衛人正德丁丑進士觀政戶部卻火耗羨

餘金數百兩授行人以事至徐徐水次倉守閹偃然席班首紹

賢令去其席武宗南巡抗疏力諫杖闕下創甚死嘉靖初贈御

史一統志舒芬所作墓志

張鶚字直夫泗州衛人嘉靖壬辰進士知臨川縣歷南工部員

外郎所至皆有惠政泗州志

侯繼高字繩武盱眙人世襲福建金山衛指揮同知升南澳副

總兵澳中祠宇城雉皆其創建舟師器械製造一新後遷都督

僉事福建通志新增

沈應乾字泣川五河人嘉靖庚戌進士知海南縣力卻餽金杖

斃奸豪捐俸修橋萬民便之粵西有出繼伯父得其巨資而不

養者其伯出游至縣聞令賢試投訴之適獲巨盜卽移文拘其

子至庭訊之云盜某供汝資財田產若干皆贓物其子泣訴曰

誠有之皆出嗣伯所得實非盜贓應乾笑曰汝負心過於盜矣

出其伯見之叩首伏罪擢戶部主事出爲保定知府升密雲兵

備所在有聲嚴嵩當國應乾未嘗一謁其門嵩嗾言官劾之遂

免歸江南通志

朱方字子大泗州人嘉靖中任金華府推官誠篤清慎淡素如

儒生諳練若老吏署縣事爭復折糧邑人德之金華府志

戴愬天長人嘉靖閒任福建閩縣知縣明敏過人吏民一見輒

記其姓名故終任無敢欺者福建通志

常三省字魯軒泗州人嘉靖丙辰進士由禮部郎出任湖廣參

議乞養歸起授江西參議泗苦水患上書撫按請開施溝濬周

橋以救泗城為總河劾奏罷職既淮流陡漲水侵祖陵三省復

以分黃導淮之說言於行河使者卒用其議以襄成功州人頌

之江南通志

盧璧字國賢盱眙人嘉靖戊戌進士二十九年任福建漳州府

居官廉潔莅事嚴明承公私冗濫之後痛加省約尤好獎進孤

寒崇尙行誼葺威惠廟清侵沒祭租以供費繕城隍廟及各祠

宇政暇修郡志親自編纂焉福建通志

柳應聘字達夫泗州人嘉靖閒以舉人任朔州知州時邊境多

事應聘撫士卒保危城抑宗藩興學校以疾致仕泗州志

蔡維藩盱眙人以貢知慶雲縣調東安勞心撫字甚得民心盱眙縣志

蔡璘盱眙人知滑縣發奸摘伏凶豪斂跡民有鬻女納官馬者

捐俸買馬還其女滑人祀之名宦盱眙縣志

李紀字月渠泗州人嘉靖己未進士隆慶初以參議駐福甯州

建籌策樓畱意學校禮賢愛民擢去士民擁送之福建通志

戚杰字翰川泗州人嘉靖乙丑進士知新蔡縣擢吏部主事治

理精明秉公正抑僥倖遷考功郎初聘花氏女未婚而瞽婦翁

請易婚杰不可遂畢姻其行誼無愧古人云

泗州志

趙卿字汝良泗州人隆慶辛未進士知德清縣廉靜持己實心

愛民擢御史彈劾不避權貴歷官太僕寺少卿

泗州志

鍾嶽靈字岱華天長舉人知南召縣病甚告歸士民詣上憲乞

畱不聽去臥治一年方得告病愈起復先是署翁源者不自檢

飭民情騷動撫按知嶽靈賢舉以代之民果緩服以病歸

天長縣志

胡士奇字浮冶天長人萬曆丙辰進士知萊蕪縣擢御史巡按

宣大疏劾魏瑞士君子稱焉

江南通志

吳崇德字東皋虹縣人萬曆間任白鹽井提舉慈祥不苛恤竈

以完課易員以便民竈戶居民感德之

湖北通志新

馮應京字可大盱眙人萬曆壬辰進士授戶部主事督薊鎮京

儲以廉幹聞歷員外郎擢湖廣僉事分巡武昌漢陽黃州繩貪

墨摧奸豪風采大著稅監陳奉恣橫不法應京抗疏列其九大

罪奉亦誣奏應京撓命凌敕使帝怒逮治父老相率詣闕訴冤

帝不省繫詔獄拷訊久之不釋應京乃於獄中著書昕夕不倦

在獄四年以星變得釋應京志操卓犖學求有用不事空言為

淮西士人之冠天啟初贈太常卿諡恭節

明史本傳

謝與源泗州貢生萬曆間福建同安縣主簿奉檄給軍需核虛

冒出納一清主吏以例錢進叱去之捕務非其職向有詭得以

為利者與源避之若浼凡上官所移獄小大必得情奉委修城

經畫有方不日而成人謂其持身如處子決讞如老吏

福建通志新

王景雲字漢翹天長人萬曆丁丑進士知西安縣治聲翕然遷

常德推官楚王家奴挾勢橫行景雲執而抵之法滇黔珍貨出

關者皆卻其贏餘天長縣志

戚伸字起綦杰之子也崇禎戊辰進士授戶部主事權潯墅關

事竣有餘羨三千金上之於朝予告家居流寇破盱眙伸輸金

犒士協力守禦泗城得不陷泗州志

徐文炯字中白天長人以明經知沁水縣蒞任日先革陋規一

千兩沁苦輪役破家設垂備法而民困蘇事有不便於民者皆

請革之邑歲賦馬價三千金請減八百勸息訟為平反去之日

沁民攀轅臥轍不得行天長縣志

徐文煥字堯文天長人以明經官荊州通判白蓮教不靖掃穴

殲之巡察鹽艇發匿屍者十餘人治其罪眾稱神明天長縣志

崇正學字佩一天長人由國子生考授州判時武舉陳啟新言

事稱旨擢省垣正學抗疏劾之降授平陽縣主簿值海寇侵擾

正學單騎往諭寇悉降敘功待升引疾歸江南通志

潘國相字蓋廷天長人官中牟丞流寇蹂躪令老不任事一切

城守軍資皆倚國相以辦城得全歸林後又佐邑令修礮臺城

守寇不能攻城亦得全天長縣志

國朝孫振先泗州人順治初署武進縣時知府宗灝貪暴多籍富

民家且將請兵屠城振先以死爭之城得以全一統志

趙君訪泗州歲貢任桐城學廉靜寡欲和易近人桐城自耆宿

以下至童子皆樂從之游興賢勸學一時稱最升博野知縣安慶志

府志

丁象鼎字耳黃五河人順治丁未進士知靈壽縣多惠政摘伏

發奸無敢欺者以親老乞養歸五河縣志

蔡陞盱眙人順治閒官雲南布政司理問吳逆叛脫身歸協力

隨征賊平攝祿豐易門等縣有善政卒於任時昭縣志

唐開先字君宗天長人順治中官平陽府經歷丕著賢聲攝鄉

甯萬泉二縣事裁陋規滅火耗後知和平到卽裁去一切供應

不以薪水煩民公餘集諸生討論文藝文教日興天長縣志

陳賡泰字龍長天長拔貢授襄陽府推官時值軍興委造漢江

浮橋三晝夜告成十萬餘軍如期畢渡升德安同知運豆餉三

十萬於荊州解餉米五十萬於沅州奔馳往來不得入本署者

三載以功擢平涼府知府天長縣志

董之燧字觀成天長人康熙辛未進士知武陟縣調平陸行取

授御史先是康熙三十二年奉

旨人丁永不加賦至是之燧請統計丁銀按畝均派部議以為相沿已久未便更張後雍正五年竟奉

旨丁隨田辦以雍正六年為始如其疏云天長縣志

王者輔字觀顏天長優貢知海豐縣地瀕山海盜賊跳梁凡將

起先揭一旗聚數十人劫掠分財卽散復起又揭旗如初前令

多不敢問輔至練兵責地保見揭旗卽報報卽率眾往前後獲

七人杖斃之盜少止又裁海船陋規聽訟視地之遠近分遲速

以本府勒受前任虧空互揭為所誣擬斬追贓民爭代輸得免

為城旦後為撫臬延入幕知其才以人才保薦發往甘肅軍前

效力乾隆元年大軍凱旋議敘補固安知縣升順天北路同知

立書院建營房升知宣化府執法不阿為揭帖所傾曾獲其人

論斬輔亦降官仍發廣東補嘉應州知州後三十餘年其族人

有過嘉應者故老引之入拜名宦祠臨行皆各有所贈云天長縣志

舊志

汪云任字孟棠盱眙進士廣東三水知縣調番禺辦理華洋交涉事力持大體擢知廣西歸順州署思恩府寬猛得宜土官畏服升江西贛州知府創立義倉盡捕搶案諸渠魁寘之法歷陝

西按察使卒盱眙縣志以下新修

汪根敬字小孟云任長子廩貢河南知縣署泌陽練兵禁暴有能聲補鎮平禁屠棺不葬立限三月積匱皆窆升許州知州修城垣學宮書院增祠祀以苦旱勸民鑿二萬餘井道光癸卯河

決中牟辦災賑活數萬人擢彰德知府嚴革積弊十四事卒官祀名宦盱眙縣志

崇杞林字有堂天長進士由庶吉士改陝西知縣歷任甘泉寶雞多德政不受一錢升鄜州告歸仍教讀自贍時稱其清天長縣志楊殿邦字疊雲泗州進士由編修歷官漕運總督咸豐三年粵

匪東竄奉

命馳赴瓜洲江口扼要駐劄疏稱瓜儀兵單請催調水陸各兵以剿為

堵揚州尋陷得

旨褫職戍新疆留營辦理勸捐團防九年卒於軍

加恩賞給道銜卹贈太僕寺卿銜史館鈔傳

張承慶字善夫盱眙拔貢官巢縣訓導升安慶府教授學有本源立身清介在任未一年病卒郡人士悼惜之懷甯縣呈册



--	--	--	--	--	--	--	--	--	--	--	--	--	--	--	--	--	--	--	--

東直奉

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

命賜扶孤附工口尉受賜除煎餅及粉吳單節贈國水劉香吳以

